

萬有文庫

第二集七百種

王雲五主編

大方廣佛華嚴經

(二十)

實叉難陀譯

澄觀撰述

商務印書館發行

大方廣佛華嚴經

(二十)

實叉難陀譯

澄觀撰述

國學基本叢書

大方廣佛華嚴經疏鈔會本卷三十九

爾時文殊師利菩薩問寶首菩薩言。

疏第三業果甚深問中亦二。初標能所問人。以事中顯理是可貴。故問寶首也。

佛子。一切衆生等有四大。無我無我所。

疏二。佛子一切下。正顯問端。中三。初舉法案定。謂諸衆生身。但四大假名。四大無主。身亦無我。安有我。所彼此同許。以爲案定。鈔四大無主等者。即淨名第二云。四大合故。假名爲身。四大無主。身亦無我。又此病起。皆由著我。是故於我不應生著。今取彼文。以釋今經。

云何而有受苦受樂。端正醜陋。內好外好。少受多受。或受現報。或受後報。

疏二云何下。正設疑難。能造能受。是謂爲我所造所受。即是我所以無我故。無能造受。誰令苦樂。無我所故。無所造受。鈔能造能受者。我在因中。即爲能造業爲所造。我在果中。即爲能受報爲所受。此中且順我所言。故淨名云。無我無造無受者。若僧佉師。能造但是冥性。我是受者。而非造者。若衛世師。我爲能造。亦爲能受。

疏何以現見而有苦等十事五對。一。苦樂者。約麤相說。三塗爲苦。人天爲樂。二。就苦中各有妍媸。三。於其樂中有內身外境。四。通於苦樂受中。若時若事。皆有多少。此上皆約生報。前生作故。五。現作現受。名現報。隔一生去受。名爲後報。

然法界中無美無惡。

疏三然法界下結難。謂二無我理。即真法界中定無善惡。未知苦樂從何而生。此問所以也。爲無我故無我耶。爲有所受亦有我耶。此致疑也。以聖言量及正理量。違於現量。如何可通。結成難也。鈔此問所以者。此中取前緣起甚深三重問意。以釋今文。

○疏第二答意云。達體業亡。迷真業起。報因業起。何須我耶。業報攬緣。虛無自體。故無我所。鈔業報攬緣下。上以業遣我。此下以緣遣於我所。

疏由法無我。非斷滅故。業果不亡。斯乃正理。聖教所明。不違現事。鈔由法無我下。上明二我俱空。此下明不壞業果之相。空有無礙。二諦雙存。是正理量。聖教所明。即聖言量。故淨名云。說法不有亦不無。以因緣故。諸法生。無我無造無受者。善惡之業亦不亡。中論云。雖空而不斷。雖有而不常。罪福亦不失。是名佛所說。言不違現事者。即是現量。以現見苦樂等報。舉體即空。不壞事也。

疏法若定有。不可造受。便違正理。鈔法若定有下。反以釋成。故中論云。若無空義者。一切則不成。時寶首菩薩以頌答曰。

隨其所行業。如是果報生。作者無所有。諸佛之所說。

疏在文分二。初一法說。餘九喻況。今初。上半約俗諦。緣生即業報相。屬答前現見。次句勝義即空。印其案定。此二不二。故不相違。無所有言。該上業果。則亦無我所。後句是聖教量。智論第二云。有業亦有果。無作業果者。此第一甚深。是諸佛所說。鈔無所有者。按文但云作者無所有。以偈文窄。故實乃作者

所作皆無所有。

譬如淨明鏡。隨其所對質。現像各不同。業性亦如是。

疏下九喻顯通相而明。喻於業果。從緣無性。不壞事相。別彰喻意。喻各不同。初三頌。喻業報無性。不壞虛相。次一偈。喻無造受者。三一偈。喻性一相殊。後四喻體無來處。初中初偈。雙喻業果皆真心現。雖無實體。而相不同。次偈。喻能生因緣相虛。後偈。喻所生業果無實。

今初。若法相宗。唯以本識爲鏡。今依法性宗。亦以如來藏性而爲明鏡。鈔亦以藏性爲鏡者。初辨定鏡體。言亦以者。非揀本識。識亦喻鏡。故楞伽云。譬如明鏡。現衆色像。現識處現。亦復如是。但法相宗。不用如來藏爲鏡。今雙用二義。故致亦言。言如來藏爲鏡者。起信論釋本覺內體相合。明中云。復次覺體相者。有四大義。與虛空等。猶如淨鏡。云何爲四。一者如實空鏡。遠離一切心境界相。無法可現。非覺照義。故二者因熏習鏡。謂如實不空。一切世間境界。悉於中現。不出不入。不失不壞。常住一心。以一切法。卽真實性。又一切染法。所不能染。智體不動。具足無漏。熏衆生。故三者法出離鏡。謂不空法。出煩惱礙。智礙。離和合相。清淨明故。四者緣熏習鏡。謂依法出離故。徧照衆生之心。令修善根。隨念示現。故釋曰。四鏡之名者。一空鏡。謂離一切外物之體。二不空鏡。謂體不無。能現萬像。故三淨鏡。謂已磨治。離塵垢。故四受用鏡。置之高臺。須者受用。四中前二。自性淨。後二。離垢淨。又初二。就因隱時說。後二。就果顯時說。又前二。約空不空爲二。後二。約體用爲二。又前二。體。後二。相。故云覺體相者。今約衆生。卽前二鏡。合而用之。以第二爲能現。以第一顯本淨。故後之二鏡。既在果位。約佛爲鏡。故於福田甚深中用。

疏然有二義。一隨境界質。現業緣影故。合云業性亦如是。二隨業緣質。現果影像故。前偈云。隨其所行業。如是果報生。二文影略。共顯業果。似有無體。鈔然有二義下。第二顯喻相。喻有三事。一鏡。二本質。三影像。以喻就法。鏡則無二。質影各二。謂一是因影。境界爲質。故合云業性。二是果影。業緣爲質。故法說云。果報生也。淨名云。是身如影。從業緣現。是故結云。二文影略。下引中論重化之義。正顯因果俱從緣空。

疏合云業者。謂善惡等三性者。通性及相。謂此業體。以無性之法而爲其性。不失業果之相而爲其性。鈔合云業者下。第三出業體等。取無記及等不動。各成三類。言不失業果者。上是理性。此即事性。如火熱性等。

疏由無性故。能成業果。由不壞相。方顯真空。故中論云。雖空亦不斷。雖有而不常。業果亦不失。是名佛所說。不失業果。方顯中道。又如鏡現穢像。非直不污鏡淨。亦乃由此顯鏡。喻淨如來藏。現生死業果亦然。非直不損眞性平等。亦乃由此知如來藏。自性恆淨也。此有四位。一能現位。復有二義。一由眞淨故。現染。二由眞淨故。不爲汙。二所現位。亦有二義。一由相虛故。不能汙。二由虛故。虛相現。三相對位。亦有二義。一由分明現染。方顯性淨。二由性本恆淨。令染妄現。四眞淨虛染。鎔融一味。無礙圓融。思之。此約染淨門。以但有所現。即爲染故。鈔由無性故下。第二顯義。於中有二。先顯中道。即融上理事二性。交徹無礙。以成中道。又如鏡現穢像下。第二約染淨。初略明上。及此段。俱證由不壞相。方顯真空。此段亦中道義。此有四位下。廣釋亦二。先正顯染淨。然但知以鏡喻如來藏。影喻生死業果。則法喻照然。一由

眞淨故能現者。卽四鏡中第二鏡義。二由眞淨故不爲汙。卽第一鏡義。亦前卽不染而染。二卽染而不染。又前卽能隨緣。二卽體不變。然二皆是能現之德。如玉之性。雖染不汙。若第三相對。方顯正在泥中。染而不染。二所現二義者。一依他無性義。二無性緣成義。三相對二義者。一卽眞如隨緣。能成萬法。方是眞如。二卽眞如不變。方能現染。若變性淨。不能現染。若不現染。無隨緣德。四眞淨等者。以如來藏舉體成生死。如來藏外無生死。故生死卽空。是如來藏。離生死外無如來藏。如波與水。一味無差。此約染淨下。結成上義。謂眞如現他時。設有淨分。亦名爲染。如鏡現像。不揀淨穢。皆非鏡體。故唯能現。得名爲淨。所現皆染。

疏更約喻中。以一異門釋。謂一鏡是定一門。二所現染淨妍媸等殊。是定異門。染淨雖虛。不能相攝。故是異也。鏡現染處。不異現淨。故是一也。三像不異鏡。是非異義。鏡外無像。故鏡不異像。是非一義。正現像時。去像亦失鏡。故上二卽非一非異門。四像雖卽鏡。而不壞像。鏡雖卽像。而不礙鏡。是亦一亦異門也。鈔更約喻中。下二約一異門釋。言鏡是定一者。謂如來藏唯一味故。所現定異者。生死緣差故。染淨雖虛下。通難釋成。先通異難。謂有問言。染淨皆虛。豈非一耶。此約喻難。生死涅槃。二俱虛寂。豈非一耶。此約法難。故此釋云。不相攝故。此通法喻。如所現像。男不攝女。故生死不能攝涅槃。以相就性。故說生死及與涅槃。二俱空寂。一際無差。以性就相。有染有淨。以有淨故。說於生死。以無淨故。說於涅槃。有煩惱時。非無煩惱。故就虛相而說異耳。欲令一者。要如來藏而以統之。是第三義。鏡現染處。下二通一難。謂有問言。鏡中既能現染現淨。豈非異耶。如來藏能成生死。能成涅槃。豈非異耶。故今答云。現染淨

處無異體。故生死涅槃。一性現故。三像不異鏡者。謂像本是異。鏡本是一。今像同鏡。故非異也。故次釋云。鏡外無像。故同鏡一。異相便無。生死本異。如來藏本一。今生死即如來藏。故生死非異。以如來藏外無生死。故鏡不異像者。鏡本是一。像本非一。今鏡同像。故非一也。正現像時。去像亦失。鏡者。釋成上義。謂去像失鏡。明鏡同像。言同像者。同像非一。非約鏡與像一也。如來藏性本來是一。生死非一。今如來藏全體爲生死。故同生死之萬差。正成生死時。若去生死。即無如來藏。此明如來藏同生死之差。非約與生死一故。是非一義也。四亦一。亦異門者。但約不壞性相。則一異歷然。四門一揆。則一異無礙。染淨相融。方爲事事無礙之鏡像也。

亦如田種子。各各不相知。自然能出生。業性亦如是。

疏二田種生芽。喻能生者。田。喻業緣也。種子。喻於識。種因也。此二相待。無性故不相知。由不相知。方能生於後。有苦芽。故云自然能出生也。亦本識爲田。名言爲種。鈔田。喻業緣者。即六地經云。業爲田。識爲種。無明所覆。愛水爲潤。見網增長。我慢溉灌。生名色芽。謂若不造業。識不成種。如穀不入田。終不生。故亦本識爲田者。上約因緣合辨。故以業爲田。今約本識含於種子。能起現行。故以本識爲田。若初地中亦云。於三界田中。復生苦芽。則約當果生處。亦得名田。顯義無方也。成不相知。類前可解。

又如巧幻師。在彼四衢道。示現衆色相。業性亦如是。

疏三幻師現幻。喻所生者。若幻色。喻報。則幻師。喻業。若幻色。喻業。則幻師。喻業因。以業亦緣生。同報無體。而幻相不亡。故中論內。以化復現化。喻業果俱空。若幻唯喻報。業則不空。四衢以喻四識住。造業

處故。鈔幻師現幻者。所生通因果。若幻色喻報下。別釋。先明果爲所生。後若幻色喻業下。辨業爲所生。業亦緣生者。如受五戒爲人業。必假戒師言教。三業之具。方成業故。業亦緣生。故中論下。義引論文。證業果俱空。彼論偈云。譬如幻化人。復作幻化人。如初幻化人。是則名爲業。幻化人所作。則名爲業果。既業果皆幻。故知並空。若幻喻報下。反成上義。四衢喻四識住者。瑜伽八十四云。謂色受想行。此之四蘊。是識蘊所住。

如機關木人。能出種種聲。彼無我非我。業性亦如是。

疏二機關出聲。喻無造受者。機關緣造。體虛無人。喻業從緣。故無造者。從機出聲。尤更非實。喻報因業起。安有受人。夫無我者。因對我無。既無有我。何有非我。著無我者。亦是倒故。

亦如衆鳥類。從穀而得出。音聲各不同。業性亦如是。

疏三出穀音別。喻性一相殊者。如鳥在穀。含聲未吐。喻業同一性。出穀聲別。猶感報無差。然雞子之中。終無鳳響。業雖無性。善惡冥熏。鈔如鳥在穀者。穀謂鳥卵。爲母所附者。含聲未吐者。庾信云。團團竹上禽。白玉裏黃金。裏有司晨鳥。含聲未吐音。借其言用。

譬如胎藏中。諸根悉成就。體相無來處。業性亦如是。

疏四有四偈。喻體無來處。皆從緣來。卽無來故。然亦不同。初一喻因含於果。無來處。又如在地獄。種種諸苦事。彼悉無所從。業性亦如是。

疏次偈果酬於因。故無所從。此二喻內。異熟業果也。

譬如轉輪王成就勝七寶來處不可得業性亦如是。

疏次偈轉輪王七寶。喻外增上業果也。鈔輪王七寶者。非在身內故。言無來處者。輪王登位。從空忽來。言七寶者。一輪寶。大如一由旬。或云四俱盧舍。三輪各減一俱盧舍。二珠寶。其狀八楞。大如人膝。三象寶。卽金脇山八千象中之最下者。四馬寶。卽帝釋廐中者。五兵寶。卽是夜叉。六主藏臣寶。卽是地神。七女寶。上者帝釋賜。下者人閒。或韃闍婆女。輪卽北方天王。令四夜叉持之。歸則在門之上。一由旬住。帝釋所賜。若依此說。則有來處。多是約教有殊。故小乘中說輪王沒後。收在鐵圍山閒。又有相似七寶。謂一劍寶。二皮寶。三殿寶。四牀寶。五林寶。六衣寶。七履寶。如智論及薩遮尼韃經第三說。又如諸世界大火所燒然。此火無來處。業性亦如是。

疏後偈喻無漏業果。無漏智火。焚蕩有漏。智因漏發。故亦無來。業果寂然。方依幻住。爾時文殊師利菩薩問德首菩薩言。

疏第四說法甚深。亦可名應現甚深。問及答中。通三業故。以說法化勝故。從此立名。先問中。初總標告。

問德首者。顯佛德故。

佛子。如來所悟。唯是一法。

疏二。正顯問端中。三。初舉法案定。謂佛證一味法界。彼此共許。

云何乃說無量諸法。現無量剎。化無量衆。演無量音。示無量身。知無量心。現無量神通。普能震動無量世界。示現無量殊勝莊嚴。顯示無邊種種境界。

疏二云何下。正設疑難。謂證悟既一。說現乃多。爲一耶多耶。鈔爲定一耶下。有三重問意。此上亦直問所以。

疏徧取互妨。鈔二云徧取互妨者。是第二帶疑問。由滯一多二途。不知何據。

疏並立相違。就法卽體用相違。約佛是證教相違。鈔三云並立相違者。卽第三成難問也。證一乖於

說多。說多違於證一。

疏下辨十種違相。前九是別。後一總結。

而法性中。此差別相。皆不可得。

疏三而法性下。釋成前難。謂非唯佛悟於一。我觀法界。亦不有多。能證所證。既並不殊。以何因緣。而現多種。將無如來乖法界耶。鈔能證所證等者。能證卽前案定。所證卽釋成中法性。

○疏答有二意。一云所證雖一。隨機現多。多在物情。佛常無念。二者所悟一法。卽無礙法界。卽事之理。全在多中所現。乃卽理之事。全居一內。以卽多之一。是所悟。卽一之多是所說。既無障礙。何有相違。鈔二者所悟等者。上之一意。以法就機。許其有一有多。出多所以。是答直爾問意也。此下唯就法體。常一常多。遺其第二懷疑。及第三難。上疑意云。爲是一耶。爲是多耶。今云亦一亦多。上第三難云。並立相違。今云相卽故不相違。又不壞相。故有一多。

疏豈唯不違。亦由得一方。能廣現由多現故。方令悟一。鈔豈唯不違下。重成第三答難之意。尙能相成。豈相違耶。

時德首菩薩以頌答曰。

佛子所問義甚深難可了。智者能知此常樂佛功德。

疏偈中分二。初一歎問利益。上半歎深。但言一理深而非甚。今卽多是一。故曰甚深。卽一之多。尤更難了。不可但以一多知故。下半知益。知此甚深。方知愛樂。

疏後九喻答。皆三句喻況。下句法合。喻中皆上二句卽體之用。二三兩句卽用之寂。又初二句以一成多次。句不礙常一。故不相違。然此九喻別答九種無量。總顯境界無量。鈔然此九喻等下。上總顯偈意。此下別釋偈文。古但直釋。今將配問總答境界者。下之九事。皆佛分齊之境。故境界爲總句故。

譬如地性一。衆生各別住。地無一異念。諸佛法如是。疏利依住勝劣地無異故。

亦如火性一。能燒一切物。火燄無分別。諸佛法如是。

疏二。火一燒多。答化無量衆物。從火化。不擇薪故。

亦如大海一。波濤千萬異。水無種種殊。諸佛法如是。

疏三。海一波異。答說無量法。義海波濤無窮盡故。

亦如風性一。能吹一切物。風無一異念。諸佛法如是。

疏四。風一吹異。答震無量界。隨物輕重動有異故。

亦如大雲雷。普雨一切地。雨滴無差別。諸佛法如是。

疏五、雲雷普雨。答無量音。圓音普震。法雨無差。故亦如地界一。能生種種芽。非地有殊異。諸佛法如是。疏六、地一芽異。答無量莊嚴。芽莖華實。爲藻飾。故如日無雲。普照於十方。光明無異性。諸佛法如是。疏七、廓日普照。答知無量心。無私普照。窮皁白。故亦如空中月。世閒塵不見。非月往其處。諸佛法如是。疏八、淨月徧見。答無量神通。不往而至。隨器現。故譬如大梵王。應現滿三千。其身無別異。諸佛法如是。疏九、梵王普應。答現無量身。不分而徧。彌法界。故梵王住自宮。普現三千諸梵處。一切人天咸得見。實不分身向於彼。諸佛現身亦如是。一切十方無不徧。其身無數不可稱。亦不分身不分別。略引一文。餘可例取。故將頌文。別對前問。文理分明。

爾時文殊師利菩薩問目首菩薩言。

疏第五、福田甚深。問中初標。告以福田是照導引生。又施爲諸度之前導。故問目首也。佛子。如來福田等一無異。

疏二、顯問端。分三初。舉法案定。佛爲生福之田。名爲福田。田德無二。名爲等一。此理共許。云何而見衆生布施果報不同。所謂種種色。種種形。種種家。種種根。種種財。種種主。種種眷屬。種種官位。

種種功德種種智慧

疏云何下正顯疑難。謂田既是一。植福應齊。施報有差。由何而起。前等此異。卽緣果相違。別顯十事。文並可知。

而佛於彼其心平等。無異思惟。

疏三釋成前難云。田雖齊等。心有高下。容可有殊。旣心無異思。報云何異。

疏答有數意。一約衆生。由器有大小。心有輕重。故得報有差。非如來答。鈔一約衆生等者。然俱舍等說。由主財田異。故施果差別。前難約田。今答約財主。然第一意正約主意。含於財異。謂多財重心。少財輕心等故。然器約觀解淺深。心之輕重。復通深淺。

疏二約佛。徧稱差別之機。方稱平等。卽一之多。差不乖等。卽多之一。等不礙差。由心平等無私。方能隨現多果。終令解脫一味。曾何異哉。鈔約佛可知。

時目首菩薩以頌答曰。

譬如大地一。隨種各生芽。於彼無怨親。佛福田亦然。

疏十頌舉十喻。喻上諸義。初一總喻印成。後九別顯。所以前中初句等是緣等。彼此共許。次句異乃因異。答別之由。次句無異思惟。成如所見。下句總合。

又如水一味。因器有差別。佛福田亦然。衆生心故異。

疏後九別中。皆上半喻。下半合一。水喻器有大小。方圓任器故。

亦如巧幻師。能令衆歡喜。佛福田如是。令衆生敬悅。

疏二幻喻。體外方便。貴且悅心。鈔體外方便者。無而假設。如無三說三等。

如有才智王。能令大衆喜。佛福田如是。令衆悉安樂。

疏三王喻。體內方便。終得實樂。上二喻佛巧稱物機。鈔體內方便者。卽佛權智。鑒事差別。卽體上大

用。爲體內方便。

譬如淨明鏡。隨色而現像。佛福田如是。隨心獲衆報。

疏四鏡喻。約衆生。謂隨妍媸而影殊。心高下而報別。與前鏡喻。因緣不同。餘義無異。後五皆約佛明。

鈔與前鏡喻者。前業果中。喻如來藏。約其自心。故是因也。今將喻佛。是喻緣故。起信論云。眞如內熏。爲

因。善友外熏。爲緣。約四鏡中。卽後二鏡。已出纏故。正取緣熏習鏡。義兼法出離鏡。以法出離。是緣熏習

鏡之體故。義如前引。餘義無別者。亦有一異染淨等義。則以佛爲淨。以生爲染。自他相望而論。一異。謂

心佛衆生。三無差別。

如阿揭陀藥。能療一切毒。佛福田如是。滅諸煩惱患。

疏五藥喻。卽多之一。具百味故。普去一切煩惱毒故。鈔普去一切者。阿伽陀。此云普去故。

亦如日出時。照耀於世間。佛福田如是。滅除諸黑暗。

疏六日喻。卽一之多。無幽不燭。大小之闇。並除。

亦如淨滿月。普照於大地。佛福田亦然。一切處平等。

疏七、月光普照。喻佛平等。拂上諸迹。雖隨機現。要且無私。

譬如毘藍風。普震於大地。佛福田如是。動三有衆生。

疏八、大風普震。喻徧動羣機。

譬如大火起。能燒一切物。佛福田如是。燒一切有爲。

疏九、大火普燒。喻終歸寂滅。又此五喻。喻滅惑智二障。至平等智地。普動諸有。皆證無爲。前四卽善巧隨機。此五則終令造極。豈不等耶。鈔又此五喻下。覆躡重釋。於中有二。先正釋五偈。阿伽陀喻。喻滅惑障。日破闇喻。喻滅智障。月光普照喻。喻至平等智地。平等智地。卽法華意。故彼經云。究竟至於一切智地。風喻普動諸有。火喻皆證無爲。至於智地。卽是菩提。是滅智障果。證無爲。是證涅槃。是滅惑障果。二因無礙。二果亦融。普動諸有者。卽所化生。普令衆生滅二障之病。證菩提涅槃之果。是此意也。前四已下。總彰答意。

爾時文殊師利菩薩問勤首菩薩言。

疏第六、正教甚深。問中。初標問人。以破懈怠。故問勤首。

佛子。佛教是一。

疏二、正顯問端。中。四。初。佛教是一者。舉法案定。一有二義。一謂斷煩惱集。證出離滅。此義不殊。彼此共許。二謂多人同見。所見不異。

衆生得見。云何不卽悉斷一切諸煩惱縛。而得出離。

疏二衆生下。正設疑難。難亦有二。一、對初義。見教之後。何以久而不脫。故云云。何不卽斷。惑出離。鈔一對初義者。謂約一人豎論。教能斷惑。一見卽合斷惑。何以久而不斷。

疏二對後義。多人同見。何以有脫不脫。故言云。何不悉斷惑而出。鈔二對後義。約多人橫說。同見斷惑之教。何以一斷一不斷耶。悉者。俱合斷故。

然其色蘊。受蘊。想蘊。行蘊。識蘊。欲界。色界。無色界。無明。貪愛。無有差別。

疏三。然其下。釋成前難。正釋後義。多人苦集。皆不殊故。五蘊。是正三界通依。此苦果也。痴愛發潤。爲集因也。兼顯初義。前後苦集。亦不殊故。

是則佛教於諸衆生。或有益。或無利益。

疏四。是則下。結成相違。出者有益。不出無益。佛教是一。其義安在。○答意云。修有勤惰。障有淺深。機有生熟。緣有具闕。智有明昧。功有厚薄。故成有遲速。答初難也。修與不修。故見同益。答後難也。上之別義。不出勤惰二門故。鈔修有勤惰等者。先答初意。總有六對。略收下喻。勤惰是總意。障有淺深。是樞溼喻。機有生熟。亦是上喻。及鑽火喻。未熟數息。是機生故。緣有具闕。卽闕緣求火。下三喻。功有厚薄。卽毛滴下三喻。修與不修下。對後難意。雖多人同見。不修不益。修則有益。

時勤首菩薩以頌答曰。

佛子善諦聽。我今如實答。或有速解脫。或有難出離。

疏十頌分二。初一開章許說。謂上半許稱實而說。下半開二章門。

若欲求除滅無量諸過惡當於佛法中勇猛常精進。

疏餘九別釋。初一釋速解脫。後八釋難出離。今初。上半牒疑。下半爲釋。勤則通策萬行。離身心相。故能速出。然有五相。一有勢力。由被甲精進。故謂於佛法中發大誓願。二勇捍。謂於廣大法中無怯劣精進。故三堅猛。由寒熱蚊蚋等所不能動。精進。故四常不捨善軌。由於無下劣。無喜足。精進。故五精進。由加行精進。故由斯五相發勤精進。速證通慧。滅障解脫。下八以喻釋難出障。總相翻前。皆名懈怠。鈔然有五相等者。卽瑜伽論八十五說。彼云。又有五相發勤精進。速證通慧。謂有勢力者。由被甲精進。故有精進者。由加行精進。故有勇捍者。由廣大法中無怯劣精進。故有堅猛者。有寒熱蚊蚋等所不能動。精進。故有不捨善軌者。由於無下劣。無喜足。精進。故今但次不同耳。

譬如微少火。樵溼速令滅。於佛教法中。懈怠者亦然。

疏一。火微樵溼。喻善根生。及三障重。暫聞教。纔少修行。而業惑內侵。令所聞速失。所行速廢。故成懈怠。難出離也。

如鑽燧求火。未出而數息。火勢隨止滅。懈怠者亦然。

疏二。鑽火數息。喻修有懈怠。然此下喻多通三慧。以辨懈怠。此喻約聞。卽聽習數息。明解不生。約思。卽決擇數息。眞智不生。約修。卽定慧數息。聖道不生。聖道如火。能燒惑薪。煖頂已前。皆名未熱。已熱而息。火尙不生。未熱數息。雖經年劫。終無得理。故遺教對此。明小水長流。則能穿石。鈔聖道如火者。二約修消經。卽俱舍論文。謂聖道如火。能燒惑薪。導火前相。故名爲煖。煖頂已前者。謂七方便中。前三方

便。卽五停心觀。別相念觀。總相念也。以暖法爲熱。故暖頂忍世第一法。此四方便。爲四善根。是加行位。然大小乘釋。小有不同。大乘之義。至初地廣釋。言已熱而息者。謂暖必至涅槃。頂中不斷善。忍不墮惡趣。第一入離生。至於暖位。猶尙斷善。故云已熱而息。未入見道。爲火尙不生。未熱數息。卽三方便。更加懈怠。何由造證。故遺教等者。卽是彼經八大人覺中。釋精進相。經云。汝等比丘。若勤精進。則事無難者。是故汝等。當勤精進。譬如小水長流。則能穿石。若行者之心。數數懈廢。譬如鑽火。未熱而息。雖欲得火。火難可得。是名精進。釋曰。彼以鑽火數息。以況懈怠。小水長流。以比精進。故云對此明小水長流。疏禪宗六祖。共傳斯喻。願諸學者。銘心書紳。鈔禪宗六祖下三結勸。初引內教結勸。自達磨教。卽用此喻。展轉相承。但云六者。後分南北。多紛競故。願諸學者。引外典結勸。言銘心者。猶如刻銘。長記不滅。言書紳者。卽論語第十七子張問行。子曰。言忠信。行篤敬。雖蠻貊之邦。行矣。言不忠信。行不篤敬。雖州里。行乎哉。立則見其參於前也。在輿則見其倚於衡也。夫然後行。子張書諸紳。注曰。紳。大帶也。疏若直就修行以釋。當以智慧鑽。注於一境。以方便繩。善巧迴轉。心智無住。四儀無間。則聖道可生。譬爾起心。暫時亡照。皆名息也。鈔若直就下。四示不息相。以智慧鑽。注於一境等者。心一境性。名之爲定。一境之言。通於事理。故遺教經云。制之一處。無事不辦。下經云。禪定持心。常一緣等。如了法無生。名爲般若。無生卽境。此理一境。了卽智慧。無住住故。名注一境。則能入理。言方便繩者。帶空涉有。照事照理。喻之以繩。有動用故。善巧迴轉者。若了無生而入理者。或觀生法。求生不得。或忘能了。入無念門。或起大悲。方能入理。如是種種。若事若理。名巧迴轉。言心智無住者。亦通事理。且約理者。若以心知如是。

心住境。若以智了心。是智住心。若內若外。皆名爲住。若住無住。亦名爲住。故經云。若心有住。則爲非住。應無所住而生其心。謂生無所住心。則非有無住可生。不生於心。則無住心生。卽此契理。亦名方便。故大品云。以無所得而爲方便。若不住事理。生死涅槃。則事理無礙之方便也。四儀無閒者。設爾有斷。亦須知斷。若不斷時。亦知無斷。常無念知。則無閒矣。警然起心。卽失止也。又違北宗。暫時忘照。卽失觀也。亦違南宗。寂照雙流。卽無斯過。

如人持日珠。不以物承影。火終不可得。懈怠者亦然。

疏三、闕緣求火喻。物者艾等也。教詮聖道。等彼火珠。要持向智日。以行承之。則聖道火生。空持文字。不能決擇。心行乖越。道何由生。

譬如赫日照孩稚。閉其目。怪言何不覩。懈怠者亦然。

疏四、閉目求見喻。智微識劣。喻彼孩稚。約聞慧者。雖對明師。不肯諮決。約思修者。雖對教日。心眼不開。責聖道之不生。何其惑矣。

如人無手足。欲以芒草箭。徧射破大地。懈怠者亦然。

疏五、闕緣心廣喻。喻愚人無淨信手。以持定弓。復無戒足。以拒惑地。以劣聞慧箭。欲徧射破業惑厚地。空欲難遂。

如以一毛端。而取大海水。欲令盡乾竭。懈怠者亦然。

疏六、毛滴大海喻。謂以少聞思。欲測法海。妄生希欲。懈怠尤深。

又如劫火起。欲以少水滅。於佛教法中。懈怠者亦然。
疏七、水少滅火喻。劫火徧熾。喻觸境惑增。少分三慧。安能都滅。

如有見虛空。端居不搖動。而言普騰躡。懈怠者亦然。

疏八、不動徧空喻。喻雖知性空。智未游履。而言徧證。亦增上慢人也。

爾時文殊師利菩薩問法首菩薩言。

疏第七、正行甚深。問法首者。以行法故。

佛子。如佛所說。若有衆生。受持正法。悉能除斷一切煩惱。

疏二、正顯問端中三。初出聖教。受謂心領義理。持謂憶而不忘。

何故復有受持正法而不斷者。隨貪瞋痴。隨慢。隨覆。隨忿。隨恨。隨嫉。隨慳。隨誑。隨諂。勢力所轉。無有離心。

疏二何故下。申其所疑。佛言能斷。今有不斷。卽教行相違。先標相違。隨貪已下。出所不斷。勢力已下。結

成不斷。謂有持法。非唯不滅舊惑。亦乃隨解新增。十一種惑勢力所轉。前四根本。後七隨惑。皆言隨者。

雜集第七。說諸煩惱。皆隨煩惱。有隨煩惱。而非煩惱。由此卽顯根本煩惱。亦得名隨。隨他生故。通釋貪

等。如九地中。今約依法新起者說。卽貪求名利。瞋所不解。迷其自行。特法自高。覆藏己短。論難生忿。結

恨擬酬。嫉彼勝己。慳自所知。不解言解。廢法逐情。鈔雜集第七等者。解妨。既分根本隨惑。何皆名隨

故爲此通。故彼論云。隨煩惱者。謂所有諸煩惱。皆是隨煩惱。有隨煩惱。非是煩惱。釋曰。非煩惱者。所謂

忿等。但隨大惑。名隨煩惱。而非根本。名非煩惱。而貪瞋痴。名隨煩惱者。心法由此隨煩惱故。隨惱於心。

令不離染。令不解脫。令不斷障。故名隨煩惱。如世尊說。汝等長夜爲貪瞋痴。隨所惱亂。心恆染污。釋曰。論意云。一切煩惱。根本隨惑。隨逐衆生。令心心所。隨順染污。故皆名隨。是以疏云。隨他生故。他卽衆生。由惑隨生。故生惑隨。正是經意。謂諸行人。心隨貪等。通釋貪者。指廣在餘。然九地中。釋其別相。若隨名。釋如唯識第六云。云何爲貪。於有有具。染著爲性。能障無貪。生苦爲業。謂由愛力。取蘊生故。釋曰。有。謂後有三有異熟之果。有具。謂彼惑業中有。及器世間。論云。云何爲瞋。於苦苦具。增恚爲性。能障無瞋。不安隱行所依爲業。謂瞋必令身心熱惱。起諸惡業。不善性故。釋曰。苦苦具。謂一切有漏無漏。但能生苦者。謂邪見等。謗無漏故。亦能生苦。論云。云何爲痴。於諸理事。迷闇爲性。能障無痴。一切雜染所依爲業。謂由無明。起疑邪定。貪等煩惱。隨煩惱業。能招後生雜染法故。釋曰。獨頭無明。多迷諦理。相應無明。亦迷事相。謂於諦等。生猶豫故。論云。云何爲慢。恃己於他。高舉爲性。能障不慢。生苦爲業。謂若有慢。於彼有德。心不謙下。由此生死輪轉無窮。受諸苦故。然根本有六疑及惡見。此中不說者。以解教人多無於疑及惡見故。後七隨惑中。然唯識隨惑。總有二十頌云。隨煩惱謂忿。恨。覆。惱。嫉。慳。誑。詔。與。害。慍。無慍及無媿。掉舉與昏沉。不信并懈怠。放逸及失念。散亂不正知。此二十中有其三品。謂初忿等十各別起。故名爲小隨煩惱。無慍等二。徧不善故。名爲中隨煩惱。掉舉等八。徧染心故。名大隨煩惱。今唯小隨。爲成十故。但舉其七。略無惱害。及憍三事。亦憍屬慢攝。惱害瞋收故。而言覆者。謂於自作罪。恐失利譽。隱藏爲性。能障不覆。悔惱爲業。謂覆罪者。後必悔惱。不安隱故。忿。謂依對現前。不饒益境。憤發爲性。能障不忿。執取爲業。謂懷忿者。多發暴惡。身表業故。恨。謂由忿爲先。懷惡不捨。結怨爲性。能障不恨。熱

惱爲業。謂結恨者。不能含忍。恆熱惱故。嫉。謂狗自名利。不耐他榮。妬忌爲性。能障不嫉。憂感爲業。謂嫉妬者。聞見他榮。深懷憂感。不安隱故。慳。謂耽著財法。不能惠捨。祕吝爲性。能障不慳。鄙畜爲業。謂慳吝者。心多鄙澁。畜積財法。不能捨故。誑。謂爲獲利譽。矯現有德。詭詐爲性。能障不誑。邪命爲業。謂矯誑者。心懷異謀。多現不實。邪命事故。諂。謂爲罔冒他故。矯設異儀。險曲爲性。能障不諂。教誨爲業。謂諂曲者。或罔冒他。曲順時宜。矯設方便。爲取他意。或藏己失。不任師友正教誨故。然諂誑。並以貪痴一分爲體。慳唯貪一分。嫉恨忿三。以瞋一分。覆以貪痴一分爲體。恐失利譽是貪。不懼當苦是痴。餘可例知。能受持法。何故復於心行之內起諸煩惱。

疏三能受持下。結成難也。佛言受法能斷煩惱。今受還起。其故何耶。○答意云。法是法藥。要在服行。服與不服。有斷不斷。非醫咎也。故十行品云。如說能行。如行能說。智論云。能行說爲正。不行何所說。若說不能行。不名爲智者。故如說行。方得佛法。不以口言而可清淨。鈔法是法藥等者。淨名云。應病與藥。令得服行。服與不服等者。卽遺教經八大人覺後云。汝等比丘。於諸功德。常常一心。捨諸放逸。如離怨賊。大悲世尊。所說利益。皆已究竟。汝等但當勤而行之。若於山間。若空澤中。若在樹下。閑處淨室。念所受法。勿令忘失。常當自勉。精進修之。無爲空死。後致有悔。我如良醫。知病說藥。服與不服。非醫咎也。又如善導。導人善道。聞之不行。非導過也。此皆勸行。智論云。能行說爲正等者。卽第六論文。故如說修行等者。卽第三地經。

時法首菩薩以頌答曰。

佛子善諦聽。所問如實義。非但以多聞。能入如來法。

疏十頌分二。初一勸讚略說。初句勸聽。遠離貢高輕慢怯弱三種雜染。方名善聽。求悟解故。專一趣心。聆音屬耳。掃滌其心。攝一切心。方名諦聽。次句讚問。顯行稱理。故名如實。下半略說。鈔遠離貢高者。卽瑜伽論三十八云。聽法由六種相。遠離貢高雜染。由四種相。遠離輕慢雜染。由一相。遠離怯弱雜染。言六相者。一應時聽。二殷重聽。三恭敬聽。四不爲損害。五不爲隨順。六不求過失。言四相者。一恭敬正法。二恭敬說人。三不輕正法。四不輕說人。言一相者。不自輕蔑。具上諸義。方名善聽。求悟解者。論云。由五相故。無散亂心。一求悟解心。二專一趣心。三聆音屬耳。四掃滌其心。五攝一切心。疏文具足。具此五心得名審諦。

疏言非但者。要兼修行。獨用多聞。不能證入。故下諸偈。皆云於法不修行。多聞亦如是。此明不行之失。非毀多聞。若無多聞。行無依故。是以不行爲失。如調達善星。行之爲得。如阿難身子。故自利利他之行。並須明達。誓窮法海。爲種智因。但應善義。勿著言說。鈔言非但等下。此下牒經。廣釋一句。顯一章大意。此明不行等下。以人多言。此章毀於多聞。令人守愚。不習教理。故爲此揀。初正揀。非毀多聞。但責聞而不行。不令行而不聞。次若無多聞者。反立無聞無解。依何而行。後是以不行爲失下。三結成上義。多聞不行。調達等。是是經所訶。多聞而行。身子等。是經所不責。善星是佛之子。調達是佛之弟。並解十二部經。不依修行。生身陷人阿鼻地獄。阿難身子。多聞行故。親得授記。故自利下。結要多聞。但應下。通伏難。謂有難言。一切經論。皆說無言。商主天子經云。無有不毀語言。而得道者。涅槃二十六云。若知如來。

常不說法。是名具足多聞者。又涅槃二十六云。甯願少聞。多解義理。不願多聞。於義不了。故爲此通。涅槃但令解義。不毀多聞。商主等經。但令莫著。豈當不許衆生聞教。

疏婆沙四十二云。多聞能知法。多聞能離罪。多聞捨無義。多聞得涅槃。淨名云。多聞增智慧。以爲自覺音。下經推度生之方便。乃至不離善巧多聞。鈔婆沙四十二下。第二引證。總引二論三經。先引一論。

二經。證須多聞。淨名卽第二答。普現色身菩薩之偈。下經卽第三地。前文已引。

疏上單顯聞。涅槃四事爲近因緣。卽雙美聞行。故智論云。多聞廣智美言語。巧說諸法轉人心。行法心正無所依。如大雲雷霍洪雨。如是教理。無量無邊。恐繁且止。鈔上單顯聞下。二雙引聞行。先引涅槃。卽第二十五高貴德王菩薩品。第七功德云。善男子。菩薩摩訶薩。修大涅槃微妙經典。作是思惟。何法能爲大般涅槃。而作近因。菩薩卽知有四種法。爲大涅槃。而作近因。若言勤修一切苦行。是大涅槃。近因緣者。是義不然。所以者何。若離四法。得涅槃者。無有是處。何等爲四。一者親近善友。二者專心聽法。三者繫念思惟。四者如法修行。善男子。譬如有人。身遇衆病。若熱若冷。虛勞下瘡。衆邪鬼毒。到良醫所。良醫卽爲隨病說藥。是人至心善受醫教。隨教合藥。如法服之。服已病愈。身得安樂。有病之人。喻諸菩薩。大良醫者。喻善知識。良醫所說。喻方等經。善受醫教。喻善思惟。方等經義。隨教合藥。喻如法修行。三十七助道之法。病除愈者。喻滅煩惱。得安樂者。喻得涅槃。常樂我淨。故云涅槃四事。雙美聞行。故智論者。然彼論第六。總有四偈。此第一偈。次偈云。多聞辨慧。巧言語。美說諸法。轉人心。自不如法行。不正。譬如雲雷而不雨。博學多聞。有智慧。訥口拙言。無巧便。不能顯發法寶藏。譬如有雲無雷雨。不廣學問。無

智慧不能說法無好行。是弊法師無慚愧。譬如不雲無雷雨。此上以行爲雨。以辨爲雲。以聞智爲雷。合是以辨爲雷。初偈總具。故今引之。次一闕行。次偈闕辨。後偈三俱闕。故云弊法師。恐繁且止者。卽智論次前云。有智無多聞。是不知實相。譬如闇夜中有目無所見。多聞無智慧。亦不知實相。譬猶大明中有燈而無目。多聞利智慧。是所說應受。無聞無智慧。是名人中牛。及餘諸經。其文甚廣。

如人水所漂。懼溺而渴死。於法不修行。多聞亦如是。

疏九頌喻明。皆上半喻。況下半法合。初懼溺渴死。喻貪隨文義失。謂義門波濤。漂蕩其心。慮溺溺他。無暇修行。自絕慧命。故名渴死。

如人設美饌。自餓而不食。於法不修行。多聞亦如是。

疏二。設食自餓。喻隨說廢思。失說法。施人多求名利。不思法味。損減法身。

如人善方藥。自疾不能救。於法不修行。多聞亦如是。

疏三。醫不自救。喻善知對治。而不自治。

如人數他寶。自無半錢分。於法不修行。多聞亦如是。

疏四。貧數他寶。喻說佛菩薩功德。不能求諸身心。故無分也。

如有生王宮。而受餒與寒。於法不修行。多聞亦如是。

疏五。王子饑寒。喻謂王子。違王法教。於內起過。故受饑寒。學人亦爾。生在法王教法宮中。行違佛教。起

惡惑業。故無慙愧忍辱之衣。甯餐法喜禪悅之味。故饑寒也。

如聾奏音樂。悅彼不自聞。於法不修行。多聞亦如是。
疏六、聾樂悅彼。喻不解自說失。謂夫真說聞者。必忘說聞。逐語而說。爲自不聞。
如盲績衆像。示彼不自見。於法不修行。多聞亦如是。

疏七、盲畫示彼。喻不見自義失。

譬如海船師。而於海中死。於法不修行。多聞亦如是。

疏八、船師溺海。喻謂將導衆人。游佛法海。倚自所解。不慎身行。爲法所淪。

如在四衢道。廣說衆好事。內自無實德。不行亦如是。

疏九、巧言無德。喻謂亦說修行。或談己德。內無實德。但有虛言。獨此一偈。三句是喻。合文但云不行亦如是。彌顯不毀多聞。又此九偈。亦可別對隨貪等義。如理應思。鈔又此九偈者。一溺水喻。隨貪愛水。故二喻隨慳。不自食故。三喻隨嫉。是內病故。四喻隨諂。數他德故。五喻隨瞋。及忿。違王之法。受饑寒故。六喻隨覆。若掩耳盜鈴。欲人不聞故。七喻隨癡。盲無見故。八喻隨慢。恃己慣故。九喻隨誑。無德說德故。

大方廣佛華嚴經疏鈔會本卷四十

爾時文殊師利菩薩問智首菩薩言。

疏第八助道甚深。問智首者。以顯智爲正道之體。統其助故。佛子。於佛法中。智爲上首。

疏二。正顯問端中三。初舉法案定。謂斷惑證理。導行得果。唯是大智。彼此同許。鈔謂斷惑等者。謂以智慧劍。殺煩惱賊。故無分別智。方證如故。言導行者。智論云。五度如盲人。般若爲有目。故能明見夷途。開導萬行。御心中道。至一切智城。故餘行得智。皆成彼岸。般若究竟成菩提果。

如來何故。或爲衆生讚歎。布施。或讚持戒。或讚堪忍。或讚精進。或讚禪定。或讚智慧。或復讚歎慈悲喜捨。疏二。如來下。正設疑難。謂旣智爲上首。應唯讚智。那亦讚餘。此是助相違難。而終無有。唯以一法。而得出離。成阿耨多羅三藐三菩提者。

疏三。而終下。結成前難。前難云。智爲上首。已應不合讚餘。況非以一法成佛。固當不合偏讚。鈔結成前難者。此下亦有三重問意。初言前難云。智爲上首。及今非唯一法成佛。不合偏讚。今有偏讚。其故何耶。此直問所以也。

疏爲要假多。爲唯用智。爲隨一行。皆得佛耶。鈔二。爲要假多下。帶疑問也。疏若隨一得成。亦遠智爲上首。進退皆妨。鈔三。若隨一得成者。結成相違難也。

○疏下答意中。印其初後。釋其中間。謂智爲上首。誠如所言。智如明王。衆之御故。小品云。般若如目。五度如盲故。印後義云。終無唯以一法。實如來歎三世諸佛。皆具說故。以餘萬行。資於智故。釋其中間別讚。乃有多意。謂隨心令喜故。隨時生善故。所治蔽殊故。入門不同故。衆生不能盡受故。下當屬文。又智論云。般若必具一切行。是故讚一。卽是讚餘。讚餘卽是讚智。鈔釋其中間下。釋中間總有五意。前四卽四隨後一統攝。今初隨心令喜。卽下隨樂。亦世界悉檀。二隨時生善。卽下隨宜。亦爲人悉檀。三所治蔽殊故。卽下隨治。亦名對治悉檀。四入門不同。卽下隨義。亦名第一義悉檀。悉檀。此云義宗。卽智論中意。諸佛說法。不離此四故。又智論下。卽第五意。般若統攝諸行。今讚一般若。卽是讚餘。餘是般若中餘。故但讚餘。已讚般若。

時智首菩薩以頌答曰。

佛子甚希有。能知衆生心。如仁所問義。諦聽我今說。

疏十頌分二。初一歎問許說。

過去未來世。現在諸導師。無有說一法。而得於道者。

疏餘九正答所難。略分爲二。先二頌開二章門。後七雙釋二章。今初初偈標衆行成果章。謂正助相假。必萬行齊修。故諸佛同說。言無有說一者。必具說也。

佛知衆生心。性分各不同。隨其所應度。如是而說法。

疏後偈標隨機別讚章。文具禪經四隨。謂初句卽隨樂也。將護彼意。稱悅其心。故性不同者。卽隨宜也。

附先世習。令易受行。習以成性。故分不同者。卽隨治也。觀病輕重。設藥多少。謂貪分多者。教不淨等。隨其所應度者。卽隨義也。道機時熟。聞卽悟故。鈔稱悅其心者。謂前人樂行布施。卽勸布施。樂行持戒。卽勸持戒等。隨順世界。順意樂故。附先世習者。心未必樂。但宿世曾作。勸則易成。如昔曾坐禪。今勸修禪。則易得定。樂約現欲。宜約有根。亦猶鍛金之子。宜令數息等。隨治可知。隨義。謂隨以何法得入第一義故。有人因禪悟道。有人因慧悟道。六度萬行。皆爲入理之門戶故。

慳者爲讚施。毀禁者讚戒。多瞋爲讚忍。好懈讚精進。亂意讚禪定。愚癡讚智慧。不仁讚慈愍。怒害讚大悲。憂戚爲讚喜。曲心讚歎捨。

疏下別釋中。二初三釋隨器別讚章。後四釋衆行成果章。前中二。初兩偈半別釋隨治。後兩句結前生後。今初然六度成其行。四等曠其心。四等多約利他。六度多明自利。六度如初會。四等如下說。然並通四隨。略舉一治耳。涅槃云。慳者之前。不讚布施者。卽隨樂意也。鈔然並通四隨者。會經文也。標章具四釋。但有一者。蓋是略耳。故引涅槃以證有四之義。謂如一布施。有樂施者勸之。卽隨樂也。昔曾修行。能生度善。卽隨宜也。因施見理。解財如夢。心事俱捨。卽隨義也。涅槃云。慳者等。卽三十四經。迦葉菩薩品。佛告迦葉。我於餘經中說五種衆生。不應還爲說五種法。爲不信者。不讚正信。爲毀禁者。不讚持戒。爲慳貪者。不讚布施。爲懈怠者。不讚多聞。爲愚癡者。不讚智慧。何以故。智者若爲是五種人。說是五事。當知說者。不得名爲具足知諸根力。不得名爲憐愍衆生。何以故。是五種人。聞是事已。生不信心。惡心。瞋心。以是因緣。於無量劫。受苦果報。今疏引之。以成今文。應具四義。言是隨樂者。彼不樂故。亦是不宜。

讚故。

如是次第修。漸具諸佛法。

疏二結前生後中。上句結前。下句生後。

○疏後四偈釋衆行成果中。各上半喻。下半合。然有二義。一仍前漸具之義。使得釋成智爲上首。二正明所用不同。故須兼具。然攝論第九。明立六度。通有三意。一爲除惑故。二爲生起佛法故。三爲成熟衆生故。前段具初意。此段通具三。謂二二合者。對治別故。先基後室等。卽漸具故。皆爲利他。卽成熟故。鈔一仍前等者。卽前如是次第修。漸具諸佛法。由仍此言。顯智得爲上首。二正明等者。行本防護。與樂別故。故須兼具。前意釋印初義。此意釋印後義。然攝論下。引論成經。通於前後。如先立基堵。而後造宮室。施戒亦復然。菩薩衆行本。

疏文中。初偈二度。爲治不發行因。故合云行本。謂著財不發施。著家不發戒故。基堵有二義。一基卽是堵。卽施爲進善之首。戒爲防惡之初。並稱基也。二堵爲環牆。卽檀爲萬行首。基也。戒防未非堵也。宮室者。解脫。

譬如建城郭。爲護諸人衆。忍進亦如是。防護諸菩薩。

疏次偈二度。已發修行心。爲治退弱心。因故。謂不能忍生死苦事。長時修助善品。有疲怠故。今忍城防。外惱之敵。進郭長內行之衆。通說則此二皆能防外養內。鈔通說則此二皆能防外養內者。諦察法。理養內德也。進防懈怠衆魔不入。防外敵也。

譬如大力王。率土咸戴仰。定慧亦如是。菩薩所依賴。

疏次偈二度。治壞失心。因故。謂散亂。壞靜慮。邪智。壞正解。故。今菩薩定靜。惑亂。慧鑑萬法。動寂自在。故菩薩依之以發通慧。賴之以證理果。其由有力之王。澄清四海。明鑒萬機。故率土戴恩。天下仰則。鈔澄清四海。喻上定也。明鑒萬機。喻上慧也。戴恩仰則。喻依賴也。

亦如轉輪王。能與一切樂。四等亦如是。與諸菩薩樂。

疏後一偈。四等爲因。自他安樂。招果無盡。故。鈔招果無盡。如慈一定。得十五果。三地當明。

爾時文殊師利菩薩問賢首菩薩言。

疏第九。一道甚深。亦名一乘。問中標問賢首者。至道柔順。故。又賢猶直善。佛佛皆同。一直道。故。

佛子。諸佛世尊。唯以一道。而得出離。

疏二。正顯問端。中三。初標宗案。定謂佛佛所乘。同觀心性。萬行齊修。自始至終。更無異徑。故云一道。此理共許。鈔同觀心性者。卽正道之一。是唯一之一。法性不並真。故。萬行齊修者。義兼正助。千佛同轍。今古不易之一道也。則明流類相同。爲一。非一二三四數之一也。

云何今見一切佛土。所有衆事。種種不同。

疏二。云何下。正設疑難。先總後別。前中。謂因道既一。果應不別。云何現見佛刹等殊。爲果異。故。因非一耶。爲因一。故。無異果耶。若雙存者。卽因果相違。鈔謂因道既一。等者。疏中有二。先釋文。初釋總句。亦有三重問意。一直問所以。故云云何現見。二爲果。故下帶疑。三若雙存下。辨相違。

所謂世界衆生界說法調伏。壽量光明神通衆會教儀法住各有差別。

疏下別辨十事。鈔所謂下經文在文易見今當略示異相。

疏一界有染淨等殊。鈔一染淨等者略有十義等字等於餘九。二大小。三所依。四形狀。五體性。六莊嚴。七清淨。八佛出。九劫住。十劫轉變。此卽世界成就品十門中。八不取起具因緣。以將因同難果異。故不等無差別門。今難差別也。爲欲滿十。故加染淨及與大小。大小卽分量故。亦形狀開出。染淨卽對濁淨。開出通餘八門。如娑婆爲染。安樂爲淨等。小如娑婆。一三千界。大如法華富樓那國。如一恆河沙三千界等量。下之九門。多如世界成就品。

疏二居人善惡等異。鈔二居人者。等取或唯地上。或有地前。或通此二。或三乘一乘等也。

疏三諸乘等別。廣略等殊。鈔三諸乘等別。或有國土說一乘。或二。或三。或四五。如是乃至無有量。或廣略者。如釋迦如來廣制戒學。迦葉卽略。乃至有佛夢中說法。

疏四或三學調伏。或強輒折伏。鈔四或三學調攝。卽用前乘教等。調攝衆生。或戒調練。或定以柔伏。或慧以攝御。言強軟者。卽勝鬘意。已如上引。淨名亦云。此土衆生。剛強難化。故佛爲說剛強之語。以調伏之。言是地獄。是畜生。是餓鬼。是惡人行。是身邪行。是身邪行報等。譬如象馬。慳悞不調。加諸楚毒。乃至徹骨。然後調伏。

疏五壽有修短。鈔五或壽有修短者。如佛名經第七。說梵聲佛壽十億歲。月面佛壽一日一夜。智度論說須扇多佛朝現。暮寂阿彌陀佛壽命無量。無邊阿僧祇劫。釋迦壽命不滿百年等。

疏六光明。或色相不同。或常放具闕。或照有遠近。鈔六光明。或色相不同者。如十定品。或見如來放黃金色光。或見如來放白銀色光等。言或常放具闕者。釋迦則具。謂常光一尋。放眉閒光。照萬八千等。若普明佛常放光明。無別常光故。

疏七隨染淨土。居人異故。現通亦殊。鈔七隨染淨等者。謂隨見勝劣。多少不同故。如普現如來國土。其中衆生。皆悉成就自然神足等。則佛爲彼現。必異此方。

疏八衆會異者。此有三種。一多少。二會數。三凡聖大小。鈔一多少者。或菩薩多。聲聞少。或反此。或俱多俱少。故世界成就品。明佛出云。或化多衆生。或調伏少衆生等。佛名經說彌留勝王佛。初會聲聞八十億。百千那由他等。斯卽多也。二會數者。如佛名經第七云。彌留勝王佛四會說法。華勝佛一會說法。聲德佛三會說法。放伽佛十會說法。或一經多會說。如華嚴般若。或一會說多經。如無量義法華。彌勒世尊。龍華三會。七佛說法。會數不同。三凡聖大小。或集聲聞等。或唯菩薩。或三乘同會等。

疏九教儀者。如此土以音聲爲教。香積以衆香教化等。鈔九教儀。如教體中。而言等者。有二。一證示等。二化儀前後。或先小後大。先大後小。或顯密不同。頓漸等異。並如教攝中說。

疏十法住者。有久近故。各有差別者。通上十位。鈔十法住久近者。如法華說華光佛。正法住世三十。二小劫。像法住世亦三十二小劫。若光明佛正像各二十小劫。山海慧自在通王佛。壽無量千萬億阿僧祇劫。正法住世復倍壽命。像法住世復倍正法。則正法二無量千萬億阿僧祇劫。像法亦爾。疏然若約一佛十事各不同者。德首已明。今問諸佛十事。互望不同耳。鈔然若約一佛下二揀濫也。恐人誤。

謂一佛一因而有多果。故爲此揀。明此是多佛同修一因。何以見果種種差別。一佛證一而果異者。如前已明。謂文殊闍德首云。如來所悟唯一法。云何乃說無量諸法。現無量利。化無量衆等。故云德首已明。

無有不具一切佛法。而成阿耨多羅三藐三菩提者。

疏第三無有下。結成前難。謂若諸佛於因行法有具不具。可有刹等不同。今皆同具。刹等那別。同具卽是一。道。

○疏第二答中意云。非爲因同。果德亦同。而見異者。隨機感耳。非佛自位而有差別。何者。諸佛因果具同。異故。謂同滿行海。是同因也。將此同因。隨所調伏。種種迴向。應機之果。是異因也。由此異因。感差別果。由上同因。同感真應身土等果。鈔第二答中下。疏文有二。先略敍答意。卽其因同。釋其果異。異自在物。同是佛同。何者。諸佛下。二廣徵釋。於中有二。初徵文殊。向以因同難於果異。今明果亦有同。何以不知。因亦有異故。胡爲不說。故云俱有同異。是則以佛就機。因果俱異。廢機說佛。因果俱同。然果同因異。相隱。因同果異。相顯。故文殊以顯難其所隱。使物齊明。成乎一道。謂同滿行海下。二釋。有四。初通釋四義。一同滿行海者。二利行也。二將此同因下。辯異因相。亦用上來二利行也。然法相宗自受用身。及受用土。自利行成。若他受用變化身土。利他行招。然則利他亦能隨機而取異果。諸佛皆爾。亦得言同。若法性宗。二利皆成。同因異因。利他不圓。安得真報。自利不足。豈能利他。故隨二行。並成自果。俱能利他。但隨所宜。化類差別。故取異果。

疏是則約佛卽同能隨異。約機同處而見異。以生就佛。雖異而常同。以佛就生。雖同而見異。以佛望佛。能異之必同。其猶錦窠常同常異。鈔是則約佛下第二結成同異。上直指因果同異之相。今此融通會釋。然有五句。此句惟約佛。既將同因迥成異因。故卽同果能爲異果。二約機者。唯約生說。心自異。故三以生就佛者。猶如四心同觀一境。一境不差。成本同義。四以佛就生者。如雖一境。令四心見殊。成能異義。五以佛望佛者。佛佛皆能隨機見異。卽是同義。結云。猶如錦窠常同常異者。融上五句。不離同異無礙。

疏瑜伽三十八諸佛平等。唯除四法。一壽量。二名號。三族姓。四身相。意明隨機故。除此四事。餘皆等也。鈔瑜伽三十八下三引證同異。除意明隨機故一句。是疏釋論。餘皆論文。

疏就果同中。自性身土一向體同。自受用者平等無二。相似名同。餘二身土亦相似名同。而隨機見異。故成唯識云。自性身土一切如來同所證故。體無差別。自受用身及所依土。雖一切佛各變不同。而皆無邊不相障礙。餘二身土隨諸如來所化有情。有共不共。所化共者同處同時。諸佛各變爲身爲土。形狀相似不相障礙。展轉相雜爲增上緣。令所化生自識變現。謂於一土有一佛身。爲現神通說法饒益於不共者。唯一佛變。諸有情類屬佛異故。鈔故成唯識下引證卽第十論於中四種身土分之爲三。初釋自性身土。旣同所證明是體同。如一室之空。二自受用。如千燈光同照室內。三餘二身土。卽他受用及變化者。正證於前亦相似名同。而隨機見異。有共不共者。共爲異故名共。非是同義。不共隨化別故。上二皆異。然共不共亦相似名同。令其各見共不共差。卽隨機見異。所化共者下第二釋也。於中三。

初釋共義。佛各變者。如今釋迦化身。若一類衆生。昔與阿閼彌陀藥師寶集。皆悉有緣。應受其化。所化之者。身不可分。在賢劫時。閻浮之處。則阿閼如來化一佛身。爲釋迦文。阿彌陀佛亦化一身。爲釋迦文。藥師琉璃光亦化一身。爲釋迦文。寶集如來亦化一身。爲釋迦文。同在迦毘菩提樹下。一時成佛。令諸衆生。但謂是一釋迦文佛。如五盞燈。同照一物。共發一影。實有多光。各發一影。而相雜。故謂之爲一。如其一人。屬於五佛。如上所明。若百千人。同屬五佛。亦如是。見五佛爲一。於不共者。二釋不共。設見十方百千化佛。亦是一佛。化現諸身耳。諸有情類者。第三雙結釋成。就上來共不共義。上來皆是論文。唯屬佛異。故一句是義引。彼論具云。諸有情類。無始時來。種性法爾。更相繫屬。或多屬一。或一屬多。故所化生。有共不共。不爾。多佛久住世間。各事劬勞。實爲無益。一佛能益一切生。故釋曰。不爾。已下。卽彼論文。彈餘師義。然應更有或多屬多。或一屬一文。無者。略有彼論云。無始時來。種性法爾。今雖取彼共不共義。但約結緣。不必法爾。然攝論中有三師義。一云共。一皆度一切等故。二云不共。以類本來相屬別故。如慈氏釋迦同事底沙佛。佛見釋迦所化先熟。爲之入定。令其七日忘下一足。一偈讚佛。超於彌勒。九劫先成。豈非別耶。三云有共不共。若一向共。何用多佛。若一向不共。不應歷事多佛。願度一切。不應以己所化衆生。付囑後佛。今唯識論卽第三正義。略彈共家。不彈不共。

時賢首菩薩以頌答曰。

文殊法常爾。法王唯一法。一切無礙人。一道出生死。一切諸佛身。唯是一法身。一心一智慧。力無畏亦然。疏偈中義理多含。故文勢非一旦分爲二。初二偈印其立宗。明真身無二。餘偈答其疑難。辨應有異同。

今初。初句總印。先標文殊者。警其聽受。法常爾者。明因果無異。法爾常規。餘顯一相。略明四一。初句法一。以法常故。諸佛亦常。次句人一次句因一。後偈果一。略舉其五。一者身一。此有二義。謂若約所證法界爲身。則體同爲一。若兼能證無量礙智爲身。卽相似名一下。旣別明心智。則正當初意。然體同義異。二心一。八識心王。俱不可知故。三智慧一。四智三智二智一智。皆無別故。四十力一。五無畏一。此五亦略攝諸德。鈔略明四一者。上以因一難於果異。今此且明因果一相。然體同義異者。通妨恐有難云。旣取初義體同爲一。則一佛證時。一切皆證。若約出現。實如所難。佛見衆生。皆已證竟。今約現事。故爲此通。以體就能。有證未證。千燈一室。所照同空。以燈就空。空體無二。以空就燈。有照未照。隨燈各取。各屬本燈。佛義亦爾。八識心王等者。以非佛無心。但深妙玄奧。難知相耳。故出現品云。如來心意識。俱不可得。但以智無量故。知如來心。旣云知如來心。則非無心矣。彼有十相。一一皆云是爲如來心。第一相等。諸菩薩摩訶薩。應如是知。今取佛佛之心。皆不可知。故名一耳。

如本趣菩提。所有回向心。得如是刹土衆會及說法。

疏二。答疑難中分二。初二偈總明隨機見異。於中前偈約佛。後偈約機。前中卽隨本異。因爲物回向。各得差別。故云如是如是。卽差別之義也。略舉十中三事耳。卽隨所化衆生而取佛土。鈔卽隨本等者。如衆生宜以直心土化。菩薩卽將直心。因取直心土等。卽隨諸衆生應以何國起菩薩根。而取佛土等。故云得如是佛土。謂染淨等土。相不一故。

一切諸佛刹莊嚴悉圓滿。隨衆生行異。如是見不同。

疏後偈約機者約佛則刹等皆圓約機隨行見別如直心爲行則見不諂之國故衆生之類是菩薩佛
士。

佛刹與佛身衆會及言說如是諸佛法衆生莫能見。

疏餘六偈展轉釋疑分四初一偈有疑云若皆圓滿何以不見答意云衆生不見豈得云無然有三義
一約他受用則地前凡小衆生不見二約自受用則等覺衆生亦皆不見若約卽應同真權教菩薩不
見鈔答意云衆生不見者卽同淨名經云爾時舍利弗承佛威神作是念若菩薩心淨則佛土淨者
我世尊本行菩薩道時意豈不淨而是佛土不淨若是佛知其意卽告舍利弗日月豈不淨耶而盲者
不見對曰不也世尊是盲者過非日月咎舍利弗衆生罪故不見如來佛國嚴淨非如來咎舍利弗我
此土淨而汝不見卽其義也。

其心已清淨諸願皆具足如是明達人於此乃能覩。

疏次偈有疑云若皆不見何以知有釋云有見者故亦有三義初則淨意樂地已去由願自在力故見
他受用二淨無塵習普賢願滿方見自受用三圓解之人則名心淨卽應見真意在初後義兼中間
鈔亦有三義初則淨意樂地者此中三義對前三義由初他受用身地前不見此辨登地則見下二例
知。

隨衆生心樂及以業果力如是見差別此佛威神故。

疏三有一偈疑云若應由物見何名佛土釋云佛威神故則知生佛共成旣攬同成異亦稱體成益。

鈔既攬同成異等者。既是如來將其同因以取異果。故令圓機。卽應見真。故云稱體成益。佛刹無分別。無憎無有愛。但隨衆生心。如是見有殊。

疏四有三偈。釋疑云。上云衆生不見淨刹。又云佛神力令異。爲刹體處別。佛有分別耶。故釋云刹實同處。佛亦無心。物自見異耳。於中初半顯實云。刹無分別。佛無憎愛。分別卽差別義。故晉經云。佛刹無異。相如來無憎愛。若順今經。亦可此二通佛及刹。次半偈明異自在物。鈔若順今經者。上取晉經意。無分別是無差別。故但屬刹。無憎愛約心。故但屬佛。今直按文。佛具無分別無憎愛。以無分別智。心平等。故刹亦無分別。無憎愛。以境但無心。卽無分別。何有憎愛。是則佛字兩用。佛無分別。佛刹無分別等。以是於世界所見各差別。非一切如來大仙之過答。

疏次半偈明正見刹異。次半偈彰非佛答。鈔次半偈等者。此明見異之因。因心及業故。下半正明見異。

一切諸世界所應受化者。常見人中雄。諸佛法如是。

疏次三句釋佛無憎愛。有感便現。非佛有愛。無感不見。非佛有憎。末後一句總結。一切諸佛法皆如是。隨機隱顯。真體常存。亦通結一段。

爾時諸菩薩謂文殊師利菩薩言。

疏第十佛境界甚深。十信觀圓。便造佛境。於中亦先問後答。問中分二。初標能所問人。大衆同問者。攝別歸總。故總別無礙。六相圓融。問文殊者。佛境甚深。除般若妙德。無能達故。始信終智。皆託佛境。故無

案定結難者。表尊敬故。若人若法。難智詰故。鈔十信觀圓等者。此明來意。亦辨在後之義。始信終智等者。文殊主二法門。一主信故。善財初見。便發信心。二主智故。善財後見。便見普賢。始人之信。亦信佛境。能度之智。亦證佛境。故文殊說。

佛子。我等所解。各自說已。唯願仁者。以妙辨才。演暢如來所有境界。

疏二。佛子我等下。正申請問。又分爲二。初結前標後。如讚妙辨者。敬上首故。

何等是佛境界。何等是佛境界。因何等是佛境界。度何等是佛境界。入何等是佛境界。智何等是佛境界。法何等是佛境界。說何等是佛境界。知何等是佛境界。證何等是佛境界。現何等是佛境界。廣何等是佛境界。

疏二何等下。別顯問端。句有十一。初總餘別。初境界有二。一分齊境界。謂從十地因後。果位之法。是佛所有。二所緣境界。謂佛所知之境。並非餘測。總爲佛境。二請問佛境。以何爲因。三請佛境界。度生儀式。四應機普入世間。五能知之智。六所知之法。七圓音起說。八明知體相。九內證平等。十顯現何法。十一量之大小。並非因位作用所及。亦非下位能知。故云佛境。若約能知。能度等。卽是分齊。約所知等。名曰所緣。能所雙融。異卽非異。言思道斷。是佛境也。鈔並非因位等者。結也。此結分齊境。亦非下位所知者。通結二境。

時文殊師利菩薩以頌答曰。

疏答中十頌。次第而答。唯廣一義。獨在於初。與總合辨。欲顯分量。徧於總故。卽深而廣故。如來深境界。其量等虛空。一切衆生入。而實無所入。

疏初句總標體深。次句分量廣大。故佛地論引經釋云。諸佛境界。唯除虛空。無能爲喻。次句釋上廣。後句釋上深。然有三義。一約一切衆生。卽如來藏。更何所入。翻迷之悟。故云證入。二約理。非卽非異。故云入無所入。三約心境。心冥真境。故說爲入。若有所入。境智未亡。豈得稱入。實無所入。方名真如。卽廣之深。本超言念。卽深之廣。安測其涯。鈔然有三義者。正釋第四句。而實無所入言。仍取第三句釋之。故皆有證入之言。此三別者。初一以理對悟說。二以理對事說。謂生是事。與理非卽。故有入言。與理非異。故無所入。三正約心境契合說。謂證冥境時。不作入解。故卽廣之深下。總結一偈意。

如來深境界。所有勝妙。因億劫常宣說。亦復不能盡。

疏二答因問。謂此因無限。略示三義。一殊勝。以行超絕。無等等故。二微妙。以證理深玄。盡法源故。三廣大。以多劫說少。亦不盡故。鈔一殊勝等者。三義並在偈中。

隨其心智。誘進咸令益。如是度衆生。諸佛之境界。

疏三答度問。謂隨其心器。意樂不同。隨其智力。解悟差別。誘引進修。令各獲益。以徧法界。委悉無謬。差別難知。故云佛境。

世間諸國土。一切皆隨入。智身無有色。非彼所能見。

疏四答入問。謂世間卽是衆生世間。國土卽器世間。一切者。徧法界故。入有二義。一以智身潛入。密益衆生故。二以色身現入。顯益衆生。智身難知。文中偏顯諸佛智自在。三世無所礙。如是慧境界。平等如虛空。

疏五答智問。上半權智。橫無不知。故云自在。暨達三際。故無所礙。下半實智。故云慧境。平等如空。無若干也。虛空之言。亦兼喻上無罣礙也。權實無礙。方爲佛境。鈔無若干者。卽淨名第三。其無礙慧。無若干也。

法界衆生界。究竟無差別。一切悉了知。此是如來境。

疏六答法問。法界是理。生界是事。攬理成事。理徹事表。故云無別。是故事則不待壞而恆眞。理則不待隱而恆俗。非直廣大無限。亦乃甚深無際。究盡了知。故稱佛境。鈔答法問。疏有二釋。前釋但融二境。後釋境智雙融。前中攬理成事者。是依理成事門。理徹事表者。是眞理卽事門。但用此二。卽顯無別。此影略明耳。亦應云理依事顯。卽事能顯理門。事徹理源。卽事法卽理門。是故事則不待壞者。成上二句。此成前句。以事全攬理。非色滅空。色性自空。故下句成下理徹事表。故不待隱而恆俗也。非直廣大下。結謂生稱眞。則一一廣大。理非事外。是謂甚深。又理徧於生。故云廣大。卽生卽理。故曰甚深。此則結歸初總偈中深廣義也。

疏又法界是所證。生界是所化。了知是能證。能化。究尋其本。亦無差別。是難知之佛境也。鈔又法界下。第二釋融境智也。則究竟無差別。有其兩向。向上融二界通。向下融能所了。故云究尋其本。亦無差別。卽能所契合同法界也。

一切世界中。所有諸音聲。佛智皆隨了。亦無有分別。

疏七答說問。一切言音。隨性隨相。皆悉了知。未曾起念。故無分別。以一切差別言音。卽是如來法輪聲。

攝故。以斯答說。音聲實相。卽法輪故。鈔以一切下。通妨。謂有問云。上問說法。今答智了。豈得同耶。故今答云。所了之聲。是佛法輪聲攝故。隨其類音爲說法故。出現品云。音聲實相。卽法輪故。賢首品亦云。能令三界所有聲。聞者皆是如來音。故上疏云。隨性隨相。皆悉了知。了相差別。隨宜之用。了性體融。一攝一切。

非識所能識。亦非心境界。其性本清淨。開示諸羣生。

疏八答知卽心體。鈔知卽心體者。此句標示。上智卽對所證之法。明能證之智。今直語靈知真心。異乎木石者。通能所證也。

疏了別卽非真知。故非識所識。鈔了別下。雙會南北宗禪。以通經意。此句卽遣南宗病也。謂識以了別爲義。了見心性。亦非真知。淨名云。依智不依識。謂分別名識。無分別名智。今有了別之識。故非真知。真知唯無念方見。

疏警起亦非真知。故非心境界。鈔警起亦非者。此釋第二句。遣北宗之病。北宗以不起心爲玄妙。故以集起名心。起心看心。是卽妄想。故非真知。是以真知。必忘心。遣照言。思道斷。故勝天王般若問云。云何菩薩修學甚深般若。通達法界。佛告勝天王言。大王卽是如實世尊。云何如實大王。卽不變異世尊。云何不變異大王。所謂如如世尊。云何如如大王。此可智知。非言能說。離相無相。遠離思量。過覺觀境。是謂菩薩修行甚深般若。了達甚深法界。釋曰。但以無念心。稱此而知。卽同佛知見。經云。如實卽無念。是用無念心。見聞覺知一切事法。心常寂靜。卽如來藏。

疏心體離念。卽非有念可無。故云性本清淨。鈔心體離念者。雙會二宗。釋第三句。以北宗宗於離念。南宗破云。離念則有念可離。無念則本自無之。離念如拂鏡。無念如本淨。今爲會之。起信旣云心體離念。亦本自離。非有念可離。亦同無念可無。卽性淨也。非看竟方淨。若無看之看。亦猶無念。念者則念真如。

疏衆生等有惑翳不知。故佛開示。皆令悟入。鈔衆生等有下。釋第四句。卽用法華開示悟入佛知見。意謂開除惑障。顯示真理。令悟體空。證入心體也。大意然矣。此有多釋。已如前引。今更略舉禪門釋之。北宗云。智用是知。慧用是見。見心不起名。智智能知。五根不動名。慧能見。是佛知見。心不動是開。開者。開方便門。色不動是示。示者。示真實相。悟卽妄念不生。入卽萬境常寂。南宗云。衆生佛智。妄隔不見。但得無念。卽本來自性。寂靜爲開。寂靜體上。自有本智。以本智能見。本來自性。寂靜名示。旣得指示。卽見本性。佛與衆生。本來無異。爲悟。悟後於一切有爲無爲。有佛無佛。常見本性。自知妄想無性。自覺聖智。故是菩薩。前聖所知。轉相傳授。卽是入義。上二各是一理。前之略釋。是疏本意。餘如別說。疏卽體之用。故問之以知。卽用之體。故答以性淨。知之一字。衆妙之門。若能虛己而會。便契佛境。鈔卽體之用下。會遠。謂前問問知。今答性淨。都無知言。何以會通。故爲此會。故水南知識云。卽體之用名知。卽用之體爲寂。如卽燈之時卽是光。卽光之時卽是燈。燈爲體。光爲用。無二而二也。知之一字。衆妙之門。亦是水南之言。若能虛己下。勸修。卽可以神會矣。難以事求也。能如是會。非唯空識而已。於我有分也。

非業非煩惱。無物無住處。無照無所行。平等行世間。

疏九答證問。卽證大涅槃三德圓也。非業繫故解脫也。非煩惱者。轉煩惱卽菩提。是般若也。無物者。虛相盡故。法身顯也。鈔非業繫下。釋相於中有三。初經中七字。示三德體。

疏無住處者。成上法身無所在也。無照者。成上般若能證相寂也。無所行者。成上解脫。無業行之用也。

鈔二無住處下八字。拂三德相。三以第四句辨三德功能。

疏由無用故。用彌法界。由無照故。無所不知。由無在故。無所不在。故結句云。平等行世間也。鈔由無用下。釋第四句。合上體相不二。故功用普周也。

疏是謂三德祕藏。佛之境也。鈔是謂三德下。結三德。廣義已見玄中。下出現品復重解釋。此但撮略對文耳。

一切衆生心。普在三世中。如來於一念。一切悉明達。

疏十答現問。上半所現。初句橫盡十方。次句豎窮三際。下半能現。並於如來圓鏡智中。無念頓現。故出現品云。菩薩普現諸心行。卽斯義也。上來辨十甚深。卽問答竟。

爾時此娑婆世界中。一切衆生。所有法差別。業差別。世間差別。身差別。根差別。受生差別。持戒果差別。犯戒果差別。國土果差別。以佛神力。悉皆明現。

疏自下第二現事結通。於中二。先現事後結通。今初。因何而現。上來十首。法光開曉衆生身心。故佛力。暫現示相而答。令其自驗而欣厭故。鈔因何而現下。疏文有三。初來意可知。二所現有十下。釋文。

疏所現有十。第一法。卽所行之法。謂三學等殊。二業。謂正行漏無漏等。三集。因苦果。四身類不同。五根機差別。六四生非一。七持戒。則人生勝劣。八犯戒。則三塗重輕。九國土。則依處染淨。十說法。則近報淨居。聰明利智。速具佛法。此經文闕。晉本具之。鈔七持戒者。如第二地中說法者。皆智論文。論第十三。引育王經云。育王常供養衆僧。有一比丘。口內馨香。育王懷疑。試而驗之。方知本有。問其所因。比丘答云。迦葉佛時。說法之果。復問說法果。唯爾耶。答。此是華報。問云。果報云何。因說偈云。大名聞端正。得樂及恭敬。威光如日月。爲一切所愛。辨才有大名。能盡一切結。苦滅得涅槃。如是名爲十。

疏又此亦可配十甚深。以是示相答故。一法首正教甚深。二寶首業果。三勤首懈怠難出。四財首觀內身等。五德首佛法一味。隨根異說等。六覺首往善惡趣。七智首六度順行。通爲持戒之果。八目首佛田平等。但犯戒布施。得果差別。九賢首隨心世界有差別等。十晉經既有說法。卽是說佛境界法也。鈔又此亦可者。重會前文。不爲此釋。則現事無由。理必合爾。但文影略。故致亦可之言。

如是東方百千億。那由他無數無量無邊無等不可數。不可稱。不可思。不可量。不可說。盡法界虛空界。一切世界中。所有衆生法差別。乃至國土果差別。悉以佛神力故。分明顯現。

疏第二如是下。結通廣徧。於中二初結東方。

南西北方。四維上下。亦復如是。

疏後南西北下。類餘九方。亦現十事。以此處說法。則現事通於十方。餘處說法。亦應類此。總爲一法界大會思之。問明品辨信中解竟。

大方廣佛華嚴經疏鈔會本卷四十一

淨行品第十一

疏釋此一品五門分別。初來意者。夫欲階妙位。必資勝行。有解無行。虛費多聞。故前品明解。此品辨行。又前明入理觀行。今辨隨事所行。又前行此願。並義次第。故次來也。鈔來意有三。初通對前後辨來。謂欲成妙位。是後十住故。前品明解。卽是對前二。又前明入理下。此及第三。俱是對前二。卽以行對行。但理事不同。三卽以願對行。則二品全別。故前品具解行二義。此品行願二義。疏次釋名者。梵云具折囉。此云所行。波利。此云皆也。徧也。戌輪。聿提。云清淨也。謂三業隨事緣歷。名爲所行。巧願防非。離過成德。名爲清淨。又悲智雙運。名爲所行。行越凡小。故稱清淨。以二乘無漏。不能兼利。非眞淨故。得斯意者。舉足下足。盡文殊心。見聞覺知。皆普賢行。文殊心故。心無濁亂。是曰清淨。普賢行故。是佛往修。諸佛菩薩同所行也。所行卽淨持業釋也。鈔文殊心下。覆成上二。然卽賢首品。初生起之意。尋文可知。

疏三宗趣者。以隨事巧願。防心不散。增長菩薩悲智大行爲宗。成就普賢實德爲趣。疏四解妨者。問文中但辨一百餘願。何有行耶。答文中辨行。略有數重。謂就所歷事中。始自出家。終於臥覺。皆是行也。觸境不迷。善達事理。智行也。以願導智。不滯自利。大悲行也。上二不二。悲智無礙行也。遇違順境。心不馳散。止行也。智不沈沒。觀行也。卽止觀雙運行也。又對於事境。善了邪正。當願衆生。皆

假觀也。知身空寂。心無染著。空觀也。見如實理。中觀也。或先空後中。或先假後空。或一或二。或一念頓具。斯爲妙達三諦觀之行也。又所造成行。皆施衆生。不起二乘之心。安忍強輒兩境。或增善品。心不異緣。妙達性空。善巧迴轉。皆願利物。同趣菩提。二乘天魔。所不能動。善知藥病。決斷無差。卽十度齊修之行也。又皆願利生。皆成佛德。見惡必令其斷。見善必令其具。卽四宏誓願之行也。故智首總標諸德。以求其因。文殊令善用心。頓獲衆果。但言惟願。豈不惑哉。鈔答文中。下初列六中。前三各有三義。如初事理三者。一事行。二理行。三事理無礙行。以願導智下。第二對中含於三行。一大悲行。二觸境不迷。善達事理。是一行。三雙達事理。爲事理無礙行。遇違順下。三對悲行總爲智行。故一智。二悲。三悲智雙運。又對於事下。四中有五。別明空假中。爲三四。三觀次第爲一行。五。三觀一心爲一行。並文處可知。三觀如前後說。

疏復有問言。夫妙行者。統唯無念。今見善見惡。願離願成。疲役身心。豈當爲道。答。若斯見者。離念求於無念。尙未得於真無念也。況念無念之無礙耶。又無念但是行之一也。豈成一念頓圓。如上所明也。行學之者。願善留心。

爾時智首菩薩問文殊師利菩薩言。

疏第五釋文中。二先智首問。舉德徵因。後文殊答。標德顯因。今初亦先標問答之人。後陳所疑之問。今初此二菩薩。爲顯圓修歷事巧願。必智爲導。故事近旨遠。唯圓行故。文殊則般若觀空。智首則溷和涉事。涉事不迷於理。故雖願而無取。觀空不遺於事。故雖空而不證。是爲權實雙游。假茲問答。鈔溷

和涉事者。梵語其舍羅。此云方便善巧。卽肇公宗本論文。論云。漚和般若者。大慧之稱也。諸法實相謂之般若。能不形證。漚和功也。適化衆生。謂之漚和。不染塵累。般若力也。然則般若之門。觀空。漚和之門。涉有。涉有未始迷虛。故常處有而不染。不厭有而觀空。故觀空而不證。是爲一念之力。權慧具矣。一念之力。權慧具矣。好思歷然可解。

疏二陳所問中。有二十云。何總十一段。段各十句。成一百一十種德。第一段明三業離過成德。二得堪傳法器。三成就衆慧。四具道因緣。五於法善巧。六修涅槃因。七滿菩薩行。八得十力智。九十王敬護。十能爲饒益。十一超勝尊貴業。此十一中。若就相顯。二四與六。此三唯因。八及十一。此二唯果。餘通因果。或攝爲四對因果。初二十句。問福因福果。先因後果。次二十句。問慧因慧果。先果後因。三二十句。問巧解因觀行果。四有五段。問修行因成德果。初一爲因。餘四爲果。或分爲二。初十云。何問淨行體。是問因義。後十云。何問行所成。是問果義。以善修七覺等。亦是淨行之能故。皆言云。何得者。爲修何行而得之耶。初十望後。故說爲因。望歷緣巧願成淨行體。卽是於果。未是圓果。而是分果。故上總云。舉果徵因。鈔以善修七覺下。解妨。謂有問云。其初意中。二四與六。此三明因。如何今十皆得名果。故爲此通。以約相顯。望菩提涅槃。此三爲因。是初十成。故得稱果。皆言下。釋云。何得言。從初十望後下。重通伏難。問初十旣因。何以前科云。智首舉德徵因。答意可知。則智首總問因果之德。文殊總舉歷緣巧願。則皆成矣。總問其果。

佛子。菩薩云。何得無過失身語意業。云。何得不害身語意業。云。何得不可毀身語意業。云。何得不可壞身

語意業云何得不退轉身語意業云何得不可動身語意業云何得殊勝身語意業云何得清淨身語意業云何得無染身語意業云何得智爲先導身語意業

疏今分爲二。初之一段總問其果。後十別明。今初十句。得此十種三業。成下十果。由無過三業。故超勝尊貴。由不恚害故。常爲饒益。由無餘惑。不可譏毀。故十王敬護。由惡緣不可壞。得佛十力。由修行不退轉。滿菩薩行。由遠離諸相。如如不動。成涅槃因。由德行殊勝。故於法善巧。由體清淨。如虛空。故成其道緣。由涉境無染。故得堪傳法器。由智先導。故成就衆慧。鈔總問其果。疏文分三。初依總別科釋。則十一段。皆是所成之果。兼含料揀。中第三意。初十爲能成。下十爲所成。從後倒牒十果。按次釋文。謂第一無過失三業。得第十一超勝尊貴果。第二不害三業。得第十能爲饒益果。三成第九。四成第八。五成第七。六成第六。七成第五。八成第四。九成第二。十成第三。唯後二前卻耳。亦可如次。猶涉境無染。故成衆慧。智爲先導。成就法器。其中加字。已當釋文。如云無恚害。以恚釋害。以涉境釋於無染。約體釋於清淨等。細尋歷然。

疏又由後十。能成就此十。以十三業。永無失等。唯佛不共。分分無失。亦通於因。又此十句。初一總顯無過。次八別顯無過。後一總出其因。若以智慧爲先導。身語意業常無失故。又於中八。前二離過後六成德。鈔又由後十下。二先果後因釋。以初十句爲果。後之十段。百句爲因。故云永無失等。唯佛不共。永無失等者。等下九句。不害業等。言不共者。卽十八不共法。謂一身業無慢失。二無卒暴音。三無種種想。四無不定心。五無忘失念。六無不擇捨。七欲無退。八念無退。九精進無退。十定無減。十一智慧無減。十

二解脫無滅。十三身業智爲先導。隨智而轉。十四語業智爲先導。隨智而轉。十五意業智爲先導。隨智而轉。十六知過去無著無礙。十七知未來無著無礙。十八知現在無著無礙。廣如別章。今以十句通攝。十八謂初二卽初三。一由三業無過害故。次二卽次三。由有念定慧故。不可毀壞故。三皆云無五六卽七八九。七卽定慧解脫。三種無滅。故稱殊勝。八九卽後三。三世無著無礙。故云清淨無染。十卽十三十四十五。智爲先導。隨智而轉。故疏云。永無失等。唯佛不共。今約分分。故爲後因。疏又後九中。不隨於瞋。故不害。不隨於慢。故不可毀。不隨惡見。故不壞敗。不隨於疑。故不退動。恆修勝行。不隨於貪。故清淨無染。不隨於癡。故智爲先導。所作稱真。如是等業。云何而得。鈔三當句對惑釋。以破六根本惑。成斯十句。疑攝三句。貪攝於二。餘四各一。故六攝九。

云何得生處具足。種族具足。家具具足。色具足。相具足。念具足。慧具足。行具足。無畏具足。覺悟具足。

疏後十段別明中。初一異熟果。次四士用果。次二離繫果。次一增上果。後二等流果。今初卽修道之器。以菩薩起修行時。要具此十方成二利之行。鈔初一異熟果者。俱舍顯相頌云。異熟無記法。有情有記生。等流似自因。離繫由慧盡。若因彼力生。是果名士用。除前有爲法。有爲增上果。釋曰。初二句異熟果相。但是無覆無記。不通非情。從善惡感。名有記生。次句等流果相。似於同類徧行自因。次句離繫果相。由慧盡者。慧卽擇也。盡卽滅也。謂此擇滅。離繫所顯。故將擇滅釋離繫果。次二句士用果相。若法因彼勢力所生。如因下地加行心力。上地有漏無漏定生。及因清淨靜慮心力生。得變化無記心等離繫。名爲不生。士用爲因道力證得。亦得士用果名。後二句增上果相。有爲法生。餘法不障。是增上果。故

唯有爲。除前已生有爲之法。謂果望因。或因俱。或後。必無前果。後因。故云除也。除此前外。餘諸有爲。謂之增上果。論云。增上之果。問。士用。增上二果。何殊。答。士用果名。唯對作者。增上果稱。通對所餘。如匠所成。對能成匠。俱得士用。增上果名。對餘非匠。唯增上果。非匠不造。故非士用。瑜伽三十八云。習不善。故樂住不善等。爲等流果。或似先業。後果隨轉。釋曰。此有二義。釋於等流。後義果似於因。即俱舍意。如殺生因等。得短壽果。前義即於後果之上。行因似因。如前世殺生。今亦好殺等。瑜伽又云。以道滅惑。名離繫果。四人工等事。由此成辦稼穡財利等果。爲士用果。若眼識等。是眼根等。增上果。身分不壞。是命根增上果。二十二根。各起自增上果。當知一切名增上果。餘例可知。然上所引俱舍。即是根品。彼論以六種因。成斯五果。非今所要。

疏。瑜伽具釋。一常生中國。有佛法處。二種族尊貴。非下賤等。三生信向三寶。修善之家。非外道等家。四形色端嚴。非醜陋等。五具丈夫相。諸根不缺。六正念不忘。亦宿念現前。七慧悟高明。善解世法。八柔和調善。離過修行。九志力堅強。故無怯弱。十性自開覺。不染世法。鈔。瑜伽第六迴向初。當廣釋之。卽有八種異熟。今開成十句。今生處具足。總明義當財位果。二卽種族果。三亦財位。四卽大色果。五人種性果。非不男等。六信言果。意由念具故。七名譽果。八義當壽命。離過修行。無夭逝故。九大力果。十亦大力。智力覺悟故。

疏。又無畏者。依智度論。菩薩有四種無畏。一總持無畏。於法記持。不懼忘失。二知根無畏。知根授法。不懼差失。三決疑無畏。隨問能答。不懼不堪。四答難無畏。有難皆通。不懼疑滯。今並皆得。故云具足。鈔。

無畏下隨難重釋。

疏又此十事。若約法者。生在佛家。是生處具足等思之。又具足者。唯佛一人云云。鈔又此十事下。約法生在佛家者。菩提心家故。等於餘句。謂二種族。卽具佛種性。謂自性住性。習所成等。三名家。卽真如爲家。亦四家故。四家如七地。四明見佛性。如見色故。涅槃云。佛性有二。一色。二非色。如來所見爲色故。五相。謂有悲智等。爲菩薩相故。餘之五句。經自約法可知。又具足下。重釋具足之言。上約橫具爲具足。今約豎說之。

云何得勝慧。第一慧。最上慧。最勝慧。無量慧。無數慧。不思議慧。無與等慧。不可量慧。不可說慧。疏第二十慧下四段。明士用果中。一慧爲揀擇。二力謂修習。三善巧謂智。四道品助修。悉以三業而得成就。今初言慧者。卽道之體。十中。一勝世間故。二過二乘故。三揀權教故。四佛果超因故。上四揀劣。餘六當體。一無分量。二無若干。三超言念。四無等匹。五難比技。六唯證相應。欲言其有無相無形。欲言其無。聖以之靈。欲言俱者。慧無二體。欲言雙非。非無詮顯。故不可說。

云何得因力。欲力。方便力。緣力。所緣力。根力。觀察力。奢摩他力。毘鉢舍那力。思惟力。

疏第三力者。卽具道因緣。皆言力者。此十各有資道之能。故一因力者。卽是種性。謂已有習種。無倒聞熏。與性種合。故名爲因。梁攝論云。多聞熏習。與阿賴耶識中解性和合。一切聖人。以此爲因。無性攝論云。此聞熏習。雖是有漏。而是出世心種子性。鈔卽是種性者。謂種性位。由於習種。合於性種。方名種性也。性種卽自性住性。爲正因性。卽是涅槃第一義空性也。習卽新熏修成之性。決爲佛因。稱爲種性。

引證可知。言無性攝論者。卽第八論釋因緣云。諸菩薩因緣。卽有言聞熏習。是無分別智。及如理作意。釋論中云。因卽能作。因緣義有言者。大乘言音。聞謂聽聞。由此引功能差別。說名熏習。以此爲因。所生意言。順理清淨。名如理作意。

疏二欲力者。有勝欲樂。希大菩提。及起行故。三方便者。謂造修力。依六方便。成悲智故。一慈悲願戀。二了知諸行。三欣佛妙智。四不捨生死。五輪迴不染。六熾然精進。攝論廣說。鈔攝論廣說。卽第七論瑜伽四十五。明內外各有六方便。此卽內六。

疏四緣力。謂善友勸發。五所緣力。卽所觀察悲智之境。六根謂信等。七觀察者。謂於自他事理藥病。善揀擇故。

疏八奢摩他。此云止也。九毘鉢舍那。此云觀也。瑜伽起信等論。深密涅槃等經。廣辨其相。具如別章。今略顯其相。以爲十門。一心行稱理。攝散名止。二止不滯寂。不礙觀事。三由理事交徹。而必俱遂。使止觀無礙。而雙運。四理事形奪。而俱盡。故止觀兩亡。而絕寄。五絕理事無礙之境。與泯止觀無礙之心。二而不二。故不礙心境。而一味。不二而二。故不壞一味。而心境兩殊。六由卽理之事。收一切法。故卽止之觀。亦見一切。七由此事。卽是彼事。故令止觀見此心。卽是彼心。八由前中。六則一多相入。而非一七則一多相是。而非異。此二不二。同一法界。止觀無二之智。頓見卽入二門。同一法界。而無散動。九由事則重。重無盡。止觀亦普眼齊照。十卽此普門之智爲主。故頓照普門法界時。必攝一切爲伴。無盡無盡。是此華嚴所求止觀。鈔瑜伽等者。前第一經疏中。已引起信。今略引瑜伽卽菩薩地品中。彼論亦引深密。

慈氏問世尊。如來說四種所緣境事。一有分別影像所緣境事。二無分別影像所緣境事。三事邊際所緣境事。四所作成辦所緣境事。幾奢摩他所緣境事。幾毘鉢舍那所緣境事。世尊答云。初一毘鉢舍那所緣境事。次一奢摩他所緣境事。後二是俱所緣境事。釋曰。初一卽事。二是理。故無分別智緣。三四通事理。故用二爲能緣。則是以事對觀義也。故前第一經疏出意。但不順無分別智。證如中義耳。廣如彼說。今取一義。故不言是非。以明十重。從旃至細。自淺暨深。故初二止觀別行。一卽瑜伽奢摩他品。二卽毘鉢舍那品。下八皆雙運品。而三正是雙運對第四雙遮。此爲雙照。若取別義。雙照皆觀。雙遮皆止。上四以理事爲能成。止觀爲所成。五融於心境。卽合前三四二門。以初二事理。卽三四所融。故絕事理。卽第四門中境。無礙卽第三門中境。泯止觀。卽第四門止觀。無礙止觀。卽第三門止觀。合上二重止觀。與二重之境。明非一異。不壞二相。故二體無異。故不二。雖融心境。方是事理無礙之門。但言相融。不說何者是止是觀者。此通三意。一但融上二重止觀。卽是此門止觀。二者照斯二而不二。不二而二。卽是於觀不取諸相。卽名爲止。三者不礙心境而一味。成卽觀之止。不壞一味而心境。成卽止之觀。後五卽事事無礙門中止觀。六是一多相融不同門。七是諸法相卽自在門。八卽合前卽入義常同時具足門。九卽因陀羅網境界門。十卽主伴圓明具德門。欲顯後後深於前前。故合卽入耳。餘可思準。此亦一處明示止觀兼廣演玄言耳。

疏十思惟者。籌量應作不應作故。

云何得蘊善巧。界善巧。處善巧。緣起善巧。欲界善巧。色界善巧。無色界善巧。過去善巧。未來善巧。現在善

巧。

疏第四於法善巧。皆約流轉以明。前四流轉之體。三界流轉之處。三世流轉之時。三科之義。略如前釋。廣如別章。緣起六地廣明。三界三世。如前後釋。皆言善巧者。一善知彼法空無所有。二善知不壞假名。分別法相。三加能攝無盡。彌善巧也。鈔皆約流轉者。由善巧義。通還滅故。總釋善巧。乃有三義。一知理。二知事。三加能攝無盡。正是事事無礙。兼於事理無礙。故小品云。一切法趣色。色尚不可得。云何當得有趣非趣。一切同歸於空。諸法之空不異色空。故卽事理無礙。今取一攝一切。卽事事無礙善巧。開此爲二。便有四義。瑜伽五十六七廣說。三科善巧。多約相說。卽第二義。

云何善修習念覺分。擇法覺分。精進覺分。喜覺分。猗覺分。定覺分。捨覺分。空無相無願。

疏第五修涅槃因。七覺三空。十地品廣說。

云何得圓滿檀波羅蜜。尸波羅蜜。麤提波羅蜜。毘黎耶波羅蜜。禪那波羅蜜。般若波羅蜜。及以圓滿慈悲喜捨。

疏第六滿菩薩行。此下二種明離繫果。初六度四等。修卽士用。滿卽離繫。治諸蔽故。

云何得處非處智力。過未現在業報智力。根勝劣智力。種種界智力。種種解智力。一切至處道智力。禪解脫三昧染淨智力。宿住念智力。無障礙天眼智力。斷諸習智力。

疏第七具足十力。並見上文。

云何常得天王。龍王。夜叉王。乾闥婆王。阿修羅王。迦樓羅王。緊那羅王。摩睺羅伽王。人王。梵王之所守護。

恭敬供養。

疏第八十王敬護。是增上果。鈔十王敬護等者。卽有力增上。由已具德。令彼護故。

云何得與一切衆生爲依。爲救。爲歸。爲趣。爲炬。爲明。爲照。爲導。爲勝導。爲普導。

疏第九云。何得與一切衆生爲依。下二段明等流果。由本願力。爲依救等。由本行力。爲第一等。今初能爲饒益。依等十句。如迴向初。鈔由本願下。卽瑜伽前意。行以昔修故。由本行力。爲第一等者。卽第二意。果似昔因。旣爲第一。故是行果。

云何於一切衆生中爲第一。爲大。爲勝。爲最勝。爲妙。爲極妙。爲上。爲無上。爲無等。爲無等等。

疏第十爲第一。下超勝尊貴。十地論釋。今就佛果略釋其相。謂如來功德海滿。更無所少。故稱第一。此亦總句。大者體。包法界故。勝者自利圓滿故。最勝者利他究竟故。妙者煩惱障盡故。極妙者所知障盡故。上者望下無及故。無上者望上更無故。無等者望下無儔故。無等等者望儔皆是無等等者。故所以廣舉諸德者。欲顯行之勝故。上來問竟。

爾時文殊師利菩薩。告智首菩薩言。善哉佛子。汝今爲欲多所饒益。多所安隱。哀愍世間。利樂天人。問如是義。

疏第二文殊答中文。分爲二。第一歎問成益。饒益者。利益也。安隱者。安樂也。利樂者。卽上二也。佛地論第七。有五重釋利樂之義。已見光明覺品。鈔佛地論第七。有五重者。一修善因得樂果故。二離惡攝善故。三此世他世益故。四世出世益故。五福德智慧益故。上之五重。各先義後利。

佛子。若諸菩薩善用其心。

疏第二佛子下。正酬其問。於中二。先標因成德。酬其舉德。後指事顯因。酬其徵因。今初先標其因。謂善用其心。心者神明之奧。心正則萬德攸歸。言善業者。卽後歷緣巧願。觸境入玄。如上所辨。則獲一切勝妙功德。

疏二則獲下。顯所成德。初總。後別。總謂一切勝妙功德。皆因用心。一百一十門德。何足難就。可謂一言蔽諸。勝謂獨尊。妙謂離相。又德無不備。云勝障無不盡。名妙。此之總句。亦卽酬上十種三業之總句也。鈔可謂一言蔽諸者。卽論語云。詩三百一言以蔽諸。曰思無邪。包曰蔽猶當也。謂歸於正。

於諸佛法心無所礙。住去來今諸佛之道。隨衆生住恆不捨離。如諸法相悉能通達。斷一切惡。具足衆善。當如普賢色像第一。一切行願皆得具足。於一切法無不自在。而爲衆生第二導師。

疏餘九別顯句。雖有九義。亦有十。如次酬上十段之德。一於諸佛法心無所礙者。卽初第一堪傳法器德。念慧覺悟。皆具足故。二住去來今諸佛之道。卽上成就衆慧。三世諸佛。唯以佛慧爲所乘故。三隨衆生住恆不捨離。卽上具道因緣。成就種性。欲樂方便。常以衆生爲所緣故。四如諸法相。悉能通達。卽十善巧義無惑也。五斷一切惡。卽七覺三空。揀擇棄惡。無越此故。六具足衆善。卽六度四等。七常如普賢色像第一。由此故得十王敬護。八一切行願皆得具足。卽是前文成就十力。得佛果位。方具足故。故管經無此一句。而有成就如來一切種智。斯爲十種智力。定無惑也。唯此一段。望前不次。以內具種智。外具色相。此二同在果圓。前後無在。或譯者不迴。九於一切法。無不自在。故能與物爲依。爲救。爲炬。爲明。

十而爲衆生第二導師。卽是上文於衆超勝。上求第一。唯佛一人。今纔發心。則道亞至尊。故云第二。然舊經中亦云而爲衆生第一尊導。故知第二譯者意也。

佛子。云何用心能獲一切勝妙功德。

疏第二佛子云何下。指事顯因。於中三。初總徵。次別顯。後總結成益。

疏二別顯中五門分別。一總明大意。文中總有一百四十一願菩薩大願。深廣如海。應如迴向。非止爾也。此蓋示於體式。餘皆倣此。又非無表一百者。十信圓融。一一具十也。四十一者。卽四十一位也。明此諸位所有惑障。由此能淨。所有勝行。由此能行。故鈔卽四十一位者。此約行修有障等。四十二卽妙覺位。是所求故。無障非行故。

疏二通顯文旨。然此諸願句雖有四事。但有三義。開爲六言三事者。謂初句願所依事。次句願所爲境。後二句是願境成益。開爲六者。初事有二。一者內。謂菩薩自身根識等。經云菩薩等故。二者外。謂他身或依正資具等。經云在家等故。次事亦二種。一能發願者。二所願衆生。經云當願衆生故。後事亦二。一者自益。由此諸願成前諸德故。二者益他。由此發願願衆生故。此後二句。或前句是因。後句是果。如云所行無逆。成一切智等。或二俱是因。如云巧事師長習行善法等。或二俱佛果。如云永離煩惱。究竟寂滅等。或俱通因果。如云以法自娛。了妓非實等。或三四二句。共成一句。如云演說種種無乖諍法等。亦可後二句中。初句所入法。如云知家性空等。後句所成益。免逼迫等。以不必具。故合爲一。

疏三別開義類。然上三事中。願所依事。雖有多類。不出善惡。依正內外。隨義準之。二願所爲境。其一

一願盡該法界一切有情。不同權小談有藏無故。又願卽是行。成迴向故。一一皆成所行清淨善業行。故如云知家性空。則菩薩之心必詣空矣。三願所爲境成利益中。由願於他。成種種德。自獲如前所說功德。然有二義。一通二別。通則隨一一願成上諸德。斯爲正意。二別顯者。如願於他。得堅固身心。無所屈。則自必成十種三業。離過成德之德也。二願於他。具足成滿一切善法。則自成就堪傳法器。三願於他。深入經藏。智慧如海。則自成衆慧。四願於他。具諸方便。得最勝法。則自成就具道因緣。五願於他。語業滿足。巧能演說。則自成就十善巧德。六願於他。得善意欲。洗除惑垢。則自成七覺三空。七願於他。所作皆辨。具諸佛法。則自成滿菩薩行德。八願於他。捨衆聚法。成一切智。則自成就如來十種智力。九願於他。皆如普賢。端正嚴好。則自成就十王敬護。十願於他。統理大衆。一切無礙。則自成饒益爲依救德。十一願他。得第一位。入不動法。則自成就超勝第一德。以斯十一。配上答中總別十一段。文並可知。通別交絡。應成四句。謂一切願成一德。一切願成一切德等。以因願一多相卽。故成德亦一多鎔融。鈔不同權小等者。小乘謂唯佛一人有大覺性。權卽五性。談其有者。藏其無者。在有佛性中故。又云通別類異。通卽皆有。別則有有佛性。有無佛性。

疏四對辨成例。謂若以初後二事相對辨例。略有十例。一會事同理例。如菩薩在家事也。性空理也。二處染翻染例。如若得五欲染也。拔除欲箭。翻染也。三相似類同例。如若有施。令一切能捨等。四世同出世例。如上升樓閣。願升正法樓等。五以因同果例。如正出家時。願同佛出家等。六捨僞歸真例。如著瓔珞。願到真實處等。七以人同法例。如見病人。願離乖諍等。八以境成行例。如見湧泉。願善根無盡等。九

以安歸真例。如見婆羅門。願離惡等。十以近同遠例。如受和尚教。願到無依處等。
疏五正釋經文。長分爲十。初有十一願。明在家時願。二有五願。出家受戒時願。三有七願。就坐禪觀
時願。四有六願。明將行披挂時願。五有七願。澡漱盥洗時願。六有五十五願。明乞食道行時願。七有二
十二願。明到城乞食時願。八有五願。明還歸洗浴時願。九有十願。明習誦旋禮時願。十有三願。明寤寐
安息時願。

大方廣佛華嚴經疏鈔會本卷四十二

佛子

菩薩在家 當願衆生 知家性空 免其逼迫 孝事父母 當願衆生 善事於佛 護養一切
妻子集會 當願衆生 怨親平等 永離貪著 若得五欲 當願衆生 拔除欲箭 究竟安隱
妓樂聚會 當願衆生 以法自娛 了妓非實 若在宮室 當願衆生 入於聖地 永除穢欲
著瓔珞時 當願衆生 捨諸僞飾 到眞實處 上昇樓閣 當願衆生 昇上法樓 徹見一切
若有所施 當願衆生 一切能捨 心無愛著 衆會聚集 當願衆生 捨衆聚法 成一切智
若在厄難 當願衆生 隨意自在 所行無礙

疏今初在家有十一願。初一總舉在家。以家是貪愛繫縛所故。若了性空。則雖處居家。家不能迫。次一
在家行孝願。以是至德行本。故首而明之。大集經云。世若無佛。善事父母。事父母者。卽是事佛。父母於
我。爲先覺故。今翻令事佛者。生長法身故。護養一切者。一切衆生皆我子。故護之。一切男女皆我父母。
故養之。生生無不從之受身。故平等敬之。法身佛故。鈔以是至德等者。卽外典意。故孝經夫子語會
子曰。先王有至德要道。民用和睦。上下無怨。汝知之乎。注云。至德者。孝悌也。要道者。禮樂也。故上至天
子。下至庶人。皆當行孝。無始終也。言行本者。俗典以孝爲百行之本。下引佛教證。菩薩戒亦云。孝養師
僧父母。孝名爲戒。亦名制止。

疏次四受家室等願。然五欲射心。猶如箭中。王侯有宮。餘皆名室。次五在家所作事業等願。在頸曰璎。在身曰珞。珞以持衣。璎以繫冠。一切悉捨。亦捨心也。了聚無性。成佛智也。

捨居家時 當願衆生 出家無礙 心得解脫 入僧伽藍 當願衆生 演說種種 無乖諍法

詣大小師 當願衆生 巧事師長 習行善法 求請出家 當願衆生 得不退法 心無障礙

脫去俗服 當願衆生 勤修善根 捨諸罪輓 鬚除鬚髮 當願衆生 永離煩惱 究竟寂滅

著袈裟衣 當願衆生 心無所染 具大仙道 正出家時 當願衆生 同佛出家 救護一切

自歸於佛 當願衆生 紹隆佛種 發無上意 自歸於法 當願衆生 深入經藏 智慧如海

自歸於僧 當願衆生 統理大衆 一切無礙 受學戒時 當願衆生 善學於戒 不作衆惡

受闍黎教 當願衆生 具足威儀 所行真實 受和尚教 當願衆生 入無生智 到無依處

受具足戒 當願衆生 具諸方便 得最勝法

疏第二捨居家下。出家受戒時有十五願。初一正捨俗家。次三出家方便。僧伽藍者。此云衆園。衆有六和法。則事理一味。故無諍也。大師謂佛衆所宗。故小謂和尚。親所教。故若約末世。三師爲大。七證爲小。靡不有初。鮮克有終。故希不退。次四正落髮出家。袈裟者。不正色衣也。亦云染色。表心染於法。要無所染。方曰染也。然二乘之染。亦非真染。必心染大乘。故云具大仙道。爲於正法。除其結使。方爲究竟寂滅。落髮披衣之後。爲正出家。鈔然二乘等者。卽涅槃第二。南經哀歎品。佛訶三修比丘云。汝諸比丘。勿以下心而生知足。汝等今者。雖得出家。於此大乘。不生貪慕。汝諸比丘。身雖得服袈裟染衣。心猶未染。

大乘淨法。汝諸比丘。雖行乞食。經歷多處。初未曾求大乘法食。汝諸比丘。雖除鬚髮。未爲正法。除諸結使。汝諸比丘。今當眞實教勅汝等。我今現在大衆和合。如來法性眞實不倒。是故汝等應當精進攝心。勇猛摧諸結使。釋曰。此以小乘方大。尙未能除所知無明。染法空法。常住妙法。故云爾也。

疏餘七受學戒時。初三自歸佛在之日。則五受之一。佛滅之後。受五八戒。必依三歸。歸要三者。翻彼外道邪師。邪教及邪衆。故猶如良醫良藥。及看病人。煩惱病愈。故爲與衆生爲緣。念故。三寶之義。至下當釋。受學戒者。卽十戒也。亦通五戒。優婆塞戒。經云。欲受菩薩戒。先應徧受五戒。十戒。二百五十戒。若尼則六事。及五百戒。受謂受戒。學卽隨戒。願中卽止。作二持。闍黎者。此云正行軌範教授。故云具足威儀。和尙。此云親教。亦云力生道力。自彼生故。故翻云入無生智。依之得戒。故翻無依。具足戒言。義含二種。一則大比丘戒。二則菩薩戒。亦制意地方爲具足。鈔則五受之一者。一善來。二上法。三三歸。四八敬。五羯磨。多釋不同。多依此五。歸要三者。前歸敬序中。已廣說竟。言至下當釋者。卽明法品。前是鈔廣。故此指下。和尙等者。此是昔時梵語。卽龜茲已來梵言。正云鄔波陀耶。此云親教。具足戒等者。依比丘戒。則五八十皆爲方便。五衆之最。爲最勝法。若菩薩戒爲具足。則比丘戒亦爲方便。超二乘上。爲最勝法。願所成者。明是佛果。

若入堂宇	當願衆生	昇無上堂	安住不動	若敷牀座	當願衆生	開敷善法	見眞實相
正身端坐	當願衆生	坐菩提座	心無所著	結跏趺坐	當願衆生	善根堅固	得不動地
修行於定	當願衆生	以定伏心	究竟無餘	若修於觀	當願衆生	見如實理	永無乖諍

捨脚踏坐 當願衆生 觀諸行法 悉歸散滅

疏第三若入堂下七願。明就坐禪觀時願。初四爲修方便。次二正修正觀。後一修行事訖。

下足住時 當願衆生 心得解脫 安住不動 若舉於足 當願衆生 出生死海 具衆善法

著下裙時 當願衆生 服諸善根 具足慚愧 整衣束帶 當願衆生 檢束善根 不令散失

若著上衣 當願衆生 獲勝善根 至法彼岸 著僧伽黎 當願衆生 入第一位 得不動法

疏第四下足住時。下。明將行披挂時六願。下衣蓋醜。故願得慚愧。上衣卽衫襖之輩。前已辨袈裟。故此

直云僧伽黎。僧伽黎者。義云和合。新者二重。故者四重。要以重成。故云和合。卽是三衣中第一衣。故

手執楊枝 當願衆生 皆得妙法 究竟清淨 嚼楊枝時 當願衆生 其心調淨 噬諸煩惱

大小便時 當願衆生 棄貪瞋癡 蠲除罪法 事訖就水 當願衆生 出世法中 速疾而往

洗滌形穢 當願衆生 清淨調柔 畢竟無垢 以水盥掌 當願衆生 得清淨手 受持佛法

以水洗面 當願衆生 得淨法門 永無垢染

疏第五手執楊枝下。澡漱盥洗時有七願。楊枝五利。是曰妙法。去穢爲淨。西域皆朝中嚼楊枝。淨穢不

相雜。此爲常規。凡欲習誦。別須用之。盥者澡也。鈔楊枝五利者。一明目。二除痰。三除口氣。四辨味。五

消食。新經有十義。朝中嚼楊枝。淨穢不相雜。此兩句語。全是無行禪師於西域寄歸之書。南海寄歸傳

亦廣說之。

手執錫杖 當願衆生 設大施會 示如實道 執持應器 當願衆生 成就法器 受天人供

發趾向道 當願衆生 趣佛所行 入無依處 若在於道 當願衆生 能行佛道 向無餘法

涉路而去 當願衆生 履淨法界 心無障礙 見昇高路 當願衆生 永出三界 心無怯弱

見趣下路 當願衆生 其心謙下 長佛善根 見斜曲路 當願衆生 捨不正道 永除惡見

若見直路 當願衆生 其心正直 無詔無誑 見路多塵 當願衆生 遠離塵坌 獲清淨法

見路無塵 當願衆生 常行大悲 其心潤澤 若見險道 當願衆生 住正法界 離諸罪難

疏第六手執錫杖下乞食道行時總有五十五願更分爲三初十二願游涉道路次見衆會下十九願

所視事境後見嚴飾下二十四願所遇人物今初錫者輕也明也執此杖者輕煩惱故明佛法故更有

多義具如經辨今略明二用一執爲行道之儀二振以乞食故發相似之願無依之道是真道也向無

餘法眞涅槃也眞淨法界心所履也險道有二一多賊鬼毒獸二阨徑阻絕初惑業罪苦凡夫之險道

也後自調滯寂二乘之險道也皆爲難處不斷生死而入涅槃正法界也

若見衆會 當願衆生 說甚深法 一切和合

疏二觀事境願初觀衆會謂衆聚多談無義故願說深法衆心易乖故令和合

若見大柱 當願衆生 離我諍心 無有忿恨

疏二大柱者舊經云大樹梵云薩擔婆去聲輕呼此云樹也薩擔婆入聲重呼此云柱也由茲二物呼

聲相濫古今譯殊柱有荷重之能一舍由之而立翻此願離我能之諍忿恨何由而生

若見叢林 當願衆生 諸天及人 所應敬禮

疏三德猶叢林。森聳可敬。

若見高山 當願衆生 善根超出 無能至頂 見棘刺樹 當願衆生 疾得剪除 三毒之刺

見樹葉茂 當願衆生 以定解脫 而爲蔭映 若見華開 當願衆生 神通等法 如華開敷

若見樹華 當願衆生 衆相如華 具三十二 若見果實 當願衆生 獲最勝法 證菩提道

若見大河 當願衆生 得預法流 入佛智海 若見陂澤 當願衆生 疾悟諸佛 一味之法

疏十一陂澤者。畜水曰陂。不集諸流。故願一味。

若見池沼 當願衆生 語業滿足 巧能演說

疏十二說文曰。穿地通水曰池。沼卽池也。取其盈滿引法流故。亦可巧思穿鑿。能有說故。

若見汲井 當願衆生 具足辨才 演一切法

疏十三汲者取也。辨才演法。猶綆汲水。

若見湧泉 當願衆生 方便增長 善根無盡 若見橋道 當願衆生 廣度一切 猶如橋梁

若見流水 當願衆生 得善意欲 洗除惑垢 見修園圃 當願衆生 五欲圃中 耘除愛草

見無憂林 當願衆生 永離貪愛 不生憂怖 若見園苑 當願衆生 勤修諸行 趣佛菩提

疏無憂林者。處之忘憂故。

見嚴飾人 當願衆生 三十二相 以爲嚴好

疏三見嚴飾下二十四願。所遇人物。

見無嚴飾 當願衆生 捨諸飾好 具頭陀行 見樂著人 當願衆生 以法自娛 歡愛不捨

見無樂著 當願衆生 有爲事中 心無所樂 見歡樂人 當願衆生 常得安樂 樂供養佛

見苦惱人 當願衆生 獲根本智 滅除衆苦

疏六云。獲根本智。滅衆苦者。若得見道。無分別根本智。則斷惡道業。無明故。三塗若滅。則三苦八苦亦皆隨滅。死及取蘊。直至金剛後根本智。則能永斷。鈔三苦八苦等者。由三塗苦滅。故生老病苦亦滅。由斷此惑。不造十惡業。故無怨憎會苦。由斷分別欲貪。故無求不得苦。及愛別離苦。從此唯有死及取蘊。至金剛無間道根本智。斷彼二苦。雖有漏善法。此時猶在行苦所隨。由彼勝智。照同法性。於解脫道。不待擇滅。任運棄捨。功歸無間。上約法相說。取正體無分別智。名爲根本。以望加行得名。雖通諸位。而見道金剛二處最顯。故略舉之。又有約法性。以本覺爲根本智。以與始覺爲根本故。此唯約解脫道證理時。與根本冥合。乃名獲得本覺根本。從此永無死及取蘊。雖斷惑證理。立二道名。然同一刹那。獲智亦爾。是故無間道。斷見修二障種時。卽是解脫道時。斷也。

見無病人 當願衆生 入真實慧 永無病惱

疏七願入真實慧。永無病惱者。此有二種。一約入真見道之慧。斷身病之苦惱。及煩惱病。謂一切惡趣諸煩惱品。所有麤重。是分別起。亦爲身病。遠因至歡喜地。真見道中。一刹那斷。頓證三界四諦。真如身病及惑。永不復有。二約金剛心慧。頓斷一切諸煩惱病。及習氣睡眠。證極圓滿真實勝義。諸惑永亡。依上解者。真實慧者。卽根本智。但約所滅惑苦不同耳。鈔一約入真見道者。亦有二義。例同斷苦。斷身

病之苦。牒前所斷及煩惱病。是此所斷。謂一切下。出所斷體。纒重即是種子。分別揀於俱生。亦爲身病。遠因者。非近因故。如房色過度。是身病近因。由貪故爾。卽爲遠因。一利那斷者。至初地中廣釋。頓證三界四諦真如。至十迴向中釋。二約金剛心等者。卽俱生也。此上所轉捨。依上解下。結成前二也。

見疾病人 當願衆生 知身空寂 離乖諍法

疏八四大乖違成病。知空則永無所乖。

見端正人 當願衆生 於佛菩薩 常生淨信 見醜陋人 當願衆生 於不善事 不生樂著

見報恩人 當願衆生 於佛菩薩 能知恩德 見背恩人 當願衆生 於有惡人 不加其報

疏於佛菩薩能知恩德者。諸佛菩薩。始自發心。普緣衆生。難行苦行。不顧自身。垂形六道。隨逐衆生。見其造惡。如割支體。迄成正覺。隱其勝德。以貧所樂法。誘攝拯救。見其慙恚。示迹涅槃。留餘福教。以濟危苦。故自頂至足。從生至死。皆佛之蔭。斯之恩德。何可報耶。得人小恩。常懷大報。不知恩者。多遭橫死。故經云。假使頂戴經塵劫。身爲牀座徧三千。若不傳法利衆生。畢竟無能報恩者。故唯自利利人。如說修行。爲報佛恩耳。鈔諸佛菩薩下文中有三。初列十恩。一發心普被恩。二難行苦行恩。猶如慈母。嚙苦吐甘。捨頭目髓腦。國城妻子。剜身千燈。投形餓虎。香城粉骨。雪嶺亡軀。如是等事。皆爲衆生。三不顧自身者。一向爲他恩。曾無一念。自爲於己。猶如慈母。但令子樂。自殺不辭。經云。菩薩所修功德行。不爲自己及他人。但以最上智慧心。利益衆生。故迴向。四垂形六道恩。謂已證滅道。應受無爲寂滅之樂。而垂形六道。徧入三塗。長劫救物。入於地獄。以身救贖。一切衆生。五隨逐衆生恩。上辨橫徧六道。今約長劫。

不捨。如子見父。視父而已。無出離心。如來隨之。如犢逐母。備將萬行。隨逐救攝。如須彌音。徧淨天王。得隨諸衆生。永流轉生死海。解脫門。六見其造惡。如割支體。卽大悲深重恩。故善財童子。謂無憂德神云。聖者譬如有人。唯有一子。愛念情至。忽見被人割截支體。其心痛切。不能自安。菩薩摩訶薩。亦復如是。見諸衆生。造煩惱業。墮三惡趣。受種種苦心。大憂惱。若見衆生。起身語意。三種善業。生人天趣。受身心樂。菩薩爾時。生大歡喜。今略舉悲深喜。亦深故。七迄成正覺。隱其勝德者。卽隱勝彰劣恩。十蓮華藏。鹿數相。海滴難稱。無盡之德。並隱不彰。但云百劫修成。三十二相。三十四心。斷見修惑。五分法身。覺樹初圓。如老比丘。同五羅漢。故法華中。脫珍御服。著弊垢衣。執除糞器。往到子所。八以貧所樂法。誘攝拯救。卽隱實施權恩。圓頓一乘。隱而不說。乃以三乘人天小法。教化衆生。此上二句。卽淨名經。第三香積品中。彼諸菩薩。問維摩詰。今世尊釋迦牟尼。以何說法。維摩詰言。此土衆生。剛強難化。故佛爲說剛強之語。以調伏之。言是地獄。是畜生。是餓鬼。是諸難處。是愚人行。是身邪行。是身邪行報等。乃云。如是剛強難化衆生。故以一切苦切之言。乃可入律。彼諸菩薩。聞說是已。皆曰。未曾有也。如世尊釋迦牟尼佛。隱其無量自在之力。乃以貧所樂法。度脫衆生。斯諸菩薩。亦能勞謙。以無量大悲生。是佛土。九見其慍恚。示跡涅槃者。示滅生善恩。故法華經云。若佛久住於世。薄福之人。不種善根。貧窮下賤。貪著五欲。入於憶想。妄見網中。若見如來。常住不滅。使起慍恚。而懷厭怠。不能生難遭之想。恭敬之心。是故如來。以方便說。比丘當知。諸佛出世。難可值遇。乃至云。斯衆生等。聞如是語。必當生於難遭之想。心懷戀慕。渴仰於佛。使種善根。四十七經。有涅槃佛事。與此大同。十留餘福教。以濟危苦者。卽悲念無盡恩。謂世尊同。

人中壽。應壽百年。留二十年福。以庇末法弟子。大集月藏分第十卷云。悲愍衆生。故捨壽。第三分。令我法海滿。洗浴諸天人。假使毀禁戒。悉住不退地。若有搗打彼。卽爲打我身。若有罵辱者。則爲毀辱我。又云。留白毫之福。以覆弟子。言留教者。卽三藏八藏。廣益衆生。依之修行。皆得成佛。形像塔廟。乃至舍利。一興供養。千返生天等。故自頂至足下。結成恩重。得人下。引經證成。共引三經。初卽涅槃第二十八。二不知恩者。卽此經四十八。隨好品。故經云下。三引他經。先一偈。具足經文。唯自利下。取意引彼。亦一偈。云。唯有傳持正法藏。宣揚教理施羣生。修習一念契真如。卽是真報如來者。會意可知。

若見沙門。當願衆生。調柔寂靜。畢竟第一。

疏沙門。此云止息。畢竟止息。唯大涅槃。

見婆羅門。當願衆生。永持梵行。離一切惡。見苦行人。當願衆生。依於苦行。至究竟處。

見操行人。當願衆生。堅持志行。不捨佛道。見著甲冑。當願衆生。常服善鎧。趣無師法。

疏世之甲冑。隨於師旅。進忍甲冑。趣於無師。

見無鎧仗。當願衆生。永離一切。不善之業。見論議人。當願衆生。於諸議論。悉能摧伏。

見正命人。當願衆生。得清淨命。不矯威儀。

疏能離五邪。方爲正命。謂一詐現奇特。二自說功德。三占相吉凶。四高聲現威。令他敬畏。五爲他說法。行此五事。若爲利養。皆邪命也。第三句通願離五。第四句但離初一。鈔能離五邪者。卽智論二十二。

其第五名稱說所得供養。以動人心。前四前同。

若見於王 當願衆生 得爲法王 恆轉正法 若見王子 當願衆生 從法化生 而爲佛子
若見長者 當願衆生 善能明斷 不行惡法 若見大臣 當願衆生 恆守正念 習行衆善
疏明斷方稱長者。守王正法始曰大臣。

若見城郭 當願衆生 得堅固身 心無所屈 若見王都 當願衆生 功德共聚 心恆喜樂

見處林藪 當願衆生 應爲天人 之所歎仰

疏第七若見城郭下。二十二願。到城乞食時願。初三總處。王都則賢達輻輳。林藪則衆德攸歸。

入里乞食 當願衆生 入深法界 心無障礙 到人門戶 當願衆生 入於一切 佛法之門

入其家已 當願衆生 得入佛乘 三世平等

疏次三入家未入。則諸家差別。入己唯一無多。如人佛乘。無二三也。

見不捨人 當願衆生 常不捨離 勝功德法 見能捨人 當願衆生 永得捨離 三惡道苦

若見空鉢 當願衆生 其心清淨 空無煩惱 若見滿鉢 當願衆生 具足成滿 一切善法

若得恭敬 當願衆生 恭敬修行 一切佛法 不得恭敬 當願衆生 不行一切 不善之法

見慚恥人 當願衆生 具慚恥行 藏護諸根 見無慚恥 當願衆生 捨離無慚 住大慈道

疏次八乞食得不。

若得美食 當願衆生 滿足其願 心無羨欲 得不美食 當願衆生 莫不獲得 諸三昧味

得柔輭食 當願衆生 大悲所熏 心意柔輭 得麤澀食 當願衆生 心無染著 絕世貪愛

若飯食時 當願衆生 禪悅爲食 法喜充滿 若受味時 當願衆生 得佛上味 甘露滿足

飯食已訖 當願衆生 所作皆辦 具諸佛法

疏次七得食正食

若說法時 當願衆生 得無盡辨 廣宣法要

疏後一食訖說法亦爲報施主之恩也。其中云藏護諸根者。瑜伽名善守根門。淨名云。所見色與盲等。乃至云知諸法如幻相是也。鈔瑜伽名善守根門者。卽第二十三論云。云何根律儀。謂如有一能善安住。密護根門。防守正念。乃至廣說。云何名爲密護根門。謂防守正念。常委正念。乃至防護意根。及正修行。意根律儀等。淨名云。所見色等者。卽迦葉章。令迦葉以空聚想。入於聚落。所見色與盲等。所聞聲與響等。所嗅香與風等。所食味不分別。受諸觸如智證。知諸法如幻相。無自性。無他性。本自不然。今則無滅等。是故藏護諸根。則不犯塵境。成六自在。王豈爲六賊所劫奪耶。

從舍出時 當願衆生 深入佛智 永出三界 若入水時 當願衆生 入一切智 知三世等

洗浴身體 當願衆生 身心無垢 內外光潔 盛暑炎毒 當願衆生 捨離衆惱 一切皆盡

暑退涼初 當願衆生 證無上法 究竟清涼

疏第八從舍出下還歸洗浴時節炎涼五願可知。

諷誦經時 當願衆生 順佛所說 總持不忘 若得見佛 當願衆生 得無礙眼 見一切佛

諦觀佛時 當願衆生 皆如普賢 端正嚴好 見佛塔時 當願衆生 尊重如塔 受天人供

敬心觀塔 當願衆生 諸天及人 所共瞻仰 頂禮於塔 當願衆生 一切天人 無能見頂
右繞於塔 當願衆生 所行無逆 成一切智 繞塔三匝 當願衆生 勤求佛道 心無懈怠
讚佛功德 當願衆生 衆德悉具 稱歎無盡 讚佛相好 當願衆生 成就佛身 證無相法
疏第九諷誦下習誦旋禮時有十願。右者順義。故普耀經第二亦云菩薩降神趣右脅者。所行無逆故。
佛功德者。謂如來十力等。

若洗足時 當願衆生 具足神力 所行無礙 以時寢息 當願衆生 身得安隱 心無動亂
睡眠始寤 當願衆生 一切智覺 周顧十方

疏第十若洗足下寤寐安息時三願。一切智覺者。非唯三世齊明。抑亦十方洞曉。一日始終既爾。餘類然。

佛子。若諸菩薩。如是用心。則獲一切勝妙功德。一切世間諸天魔梵沙門婆羅門乾闥婆阿修羅等。及以一切聲聞緣覺。所不能動。

疏第三佛子。若諸菩薩下結歎因所成益。若能如上。爲善用心。若此用心。則內德齊圓。外不能動。心游大智。故人天不能動。心冠大悲。故二乘不能動。不動有二。一修行時。此等不能惑亂。故二不希彼故。

大方廣佛華嚴經疏鈔會本卷四十三

賢首品第十二之一

疏初來意者。夫行不虛設。必有其德。既解行圓妙。必勝德難思。收前行願。成信德用。故次來也。又前智首舉果徵因。文殊廣顯其因。略標其果云。獲一切勝妙功德。故問賢首。今廣斯言。是以偈初躡前起後。鈔夫行不虛設者。此有二來意。初對前行以成今德。後又前智首下。廣前所成之德。故次來也。

疏二釋名者。謂體性至順。調善曰賢。吉祥勝德。超絕名首。卽以此名菩薩。演說此法。賢卽是首。賢首之品。以當賢位之初。攝諸德故。偏舉賢名。

疏三宗趣者。於信門中。成普賢行德。而自在莊嚴。無方大用。建立衆生。通貫始終。該攝諸位。以爲其宗。令起圓融信行。成位德用。而爲意趣。鈔令起圓融等者。天台智者。依此一品。立圓頓止觀。止觀第一云。此菩薩聞圓法。起圓信。立圓行。住圓位。以圓功德。而自莊嚴。以圓力用。建立衆生。今宗卽圓法。意趣有五。一信卽起圓信。二行三位四德。五用皆以上圓融貫之。彼釋聞法云。謂聞生死卽法身。煩惱卽般若。結業卽解脫。雖有三名。而無三體。雖是一體。而立三名。是三卽一相。其實無有異。法身究竟般若解脫亦究竟般若清淨。餘亦清淨。解脫自在。餘亦自在。聞一切法。亦復如是。是名聞圓法。云何起圓信。信一切法。卽空卽假卽中。無一二三。而一二三。無一二三。是遮一二三。而一二三。是照一二三。無遮無照。直入中道。皆究竟清淨自在。聞深不怖。聞廣不疑。聞非深非廣。意而有勇。是名圓信。云何行圓行。一向

專求無上菩提。不餘趣向。三諦圓修。不爲無邊所寂。不爲有邊所動。不動不寂。直入中道。是名圓行。其位德用之圓。全引今經。若自取當經聞圓。卽聞上同時具足等十種玄門。及依正無礙等。依此起信。卽是圓信。其圓行等。並廣如前說。今此一品。多廣圓德用耳。

爾時文殊師利菩薩。說無濁亂清淨行大功德已。欲顯示菩提心功德故。以偈問賢首菩薩曰。

疏四釋文者。文有三分。初文殊發起。次賢首廣說。三十方現證。今初分二。初經家敘述。二正明發起。二段各有結前生後。今初先結前已說。順違皆順。客塵不能濁其心。悲智雙游。萬境不能亂其慮。是曰清淨行矣。大功德者。卽前所成之果。後欲顯示下生後。文含始終。約終則顯示信滿。菩提心殊勝功德。廣具五位。因行盡故。約始。但於生死誓證菩提。萬德攸依。故今顯示。

我今已爲諸菩薩。說佛往修清淨行。仁亦當於此會中。演暢修行勝功德。

疏二偈。正發起中。前半結前。偈文窄故。略無所成之德。後半勸說。令說修行之德。則與長行文有影略。鈔則與長行等者。長行起後。但起發心。偈中起後。但起修行。故二處起後。互爲影略。就結前中。長行有大功德。無佛往修。偈有往修。復闕功德。亦是影略。

爾時賢首菩薩以偈答曰。

疏第二爾時賢首下。賢首廣說。於中先總標舉。以偈答者。此略有二。一少言攝多義故。二美詞讚說。令淨信故。以始德該終。散說難盡故。顯此勝妙之功德故。

善哉仁者應諦聽。彼諸功德不可量。我今隨力說少分。猶如大海一滴水。

疏第二正顯。偈詞有三百五十九頌半。大爲三分。初四頌。讚許說分。次三百四十六偈半。正說勝德。分三。九偈。投量勸持分。初中分二。初偈。總明前半讚問勸聽。後半謙己少說。海喻次下當明。若有菩薩初發心。誓求當證佛菩提。彼之功德無邊際。不可稱量無與等。何況無量無邊劫。具修地度諸功德。十方一切諸如來。悉共稱揚不能盡。如是無邊大功德。我今於中說少分。譬如鳥足所履空。亦如大地一微塵。

疏後三開章以發心之德。況出修行。巧顯深廣。於中初偈。舉發心章。次偈。況出修行章。初心祈於當證。德已叵量。況長時入位徧修。故多佛不能盡說。後偈。許說分齊。前半法說。如是者。雙指發心修行。下文具顯故。前文雙問故。後半喻明。然有二意。一顯喻少分。謂發心行德。如太空大地。所說者。陋如足履一塵。二密喻不異。謂鳥足之空。不異太空。微細之塵。不殊大地。故此略說。義無不周。若廣若略。皆無邊故。出現品云。如鳥飛虛空。經於百年。已經過處。未經過處。皆不可量。何以故。虛空無邊際故等。彼就果行。此就因德。然普賢行德。似同佛果。是故皆以虛空爲量。上下文中。皆同此說。鈔後三開章下。此段有二。先正釋經文。

疏此初發心。與下文十住初發心住。及發心功德品。各何別耶。此中發心。該於初後。取其成德。乃是信終。取其爲本。乃在初發。雖如輕毛功德初發。故十住初發。卽是此終。成彼初發。此終爲能發。彼是所發。此正是發起之發。義兼開發。彼是開發之發。義兼發起。其發心品。正顯十住初心之功德耳。以斯甄別。非無有異。故瓔珞云。發心住者。是人始從具縛。未識三寶。乃至值佛菩薩教法中。起一念信。便發菩提。

心。既云始從凡夫最初發心。明知此中發心。該於初後。鈔以斯甄別者。此中異下二處之文。故瓔珞云下。證成發心通始義也。彼經第二初釋經義云。佛子。發心住者。是人始從具縛凡夫。未識三寶聖人。未識好惡。因之與果。一切不識。不解不知。佛子。從不知始於凡夫地。值佛菩薩教法之中。起一念信。便發菩提心。是人爾時住前。名信相菩薩。亦名假名字菩薩。其人略行十心。所謂信心。進心。念心。定心。慧心。戒心。迴向心。護法心。捨心。願心。又云。佛子。發心住。是上進分善根人。若一劫二劫。乃至一恆二恆。佛所行十信心。信三寶常住等。明知此中發心。該於初後者。具縛未識。初發爲始。而一劫二劫修行。方得初住。住前但名信相菩薩。居然通始終也。

疏問。此既是初。何得乃具後諸行位。及普賢德耶。古德釋此。略有二門。一行布次第門。謂從微至著。從淺至深。次第相乘。以階彼岸。如瓔珞仁王起信瑜伽等說。二圓融攝門。謂一位卽具一切位等。如此經所說。亦如大品等中。一行具一切行。此中有二門。一緣起相由門。二法界融攝門。前中普攬一切。始終諸位。無邊行海。同一緣起。爲普賢行德。良以諸緣相望。略有二義。一約用。由相待故。有有力無力義。是故得相收。及相入也。二約體。由相作故。有有體無體義。是故得相卽。及相入是也。此經之中。依斯義。故行位相收。總有四說。一。或始具終。如此門中。具一切行位。賢普德海者是也。二。或終具始。並在十地位後。如下文十定十通等說。三。或諸位齊收。並在十住等。一位中。各收一切。悉至究竟。如下文十住十行等說。四。或諸位皆泯。行德顯然。如離世閒品說。二法界融攝門者。謂此諸位及所修行。皆不離普賢無盡法界。然此法界。圓融無限。隨在一位。卽具一切。今在信門。收無不盡。下諸位中。皆具一切者。並

準此釋。鈔如下文十定十通等說者。定通二品。義該始終。故等者。等取十忍。下經十忍之中。有音聲順忍等。謂約五忍明義。七八九地。得於無生。已過信順。況於等覺。今明等覺。有音聲等。故是攝初十住十行等說者。謂位位滿處。皆成佛故。一住若不收諸住。云何說得位滿成佛。故十住後有灌頂住。海幢灌頂之後。便說佛故。如離世閒品說者。離世閒品具二千行法。如次配於住行。而不存其位名。但有與位相應之行故。

疏問。下發心功德品。亦說初心具無邊德。與此何別。答。此據行首信門所具。彼約行本菩提心具。問。約法相收。是則可爾。約人修行。豈十千劫。修信纔滿。卽得如此無邊德。海答。以法是圓融具德法故。若諸菩薩。行此法行。是彼所收。或無量劫。或無定限。十千劫言。非此所說。如下善財童子及兜率天子等。所行所得。並是其人。不同行布次第教中之所說也。又十千劫。乃是一經。瓔珞但言一劫二劫。此經縱有行布。亦皆圓融。鈔又十千劫。乃是一經。是卽仁王經。此經縱有行布。下三通伏難。謂有難言。如上所說。既有行布。此與諸經復云何異。故今答云。行布乃是圓融之行布耳。

疏亦有引此下文。證成此信。乃是捨異生性。成就聖性。出無明地。生如來家。以有則獲灌頂而升位等。非是性故。若爾。初地豈得灌頂升位等耶。若云展轉進入佛地。何以不得始自於信。展轉入耶。若許從信展轉入者。何以要判此乃捨凡入聖。下文自有十地之會。此中尙隔住行向等。判爲入地。乃孟浪之談。下發心品。亦判爲初地發心。義同此會。鈔亦有引此下第二傍敍異說。卽安國法師於中有三。初正立意明。此中發心。是初地證發心。非信成就發心。以其作用殊勝。非地前故。以有則獲灌頂而升位。

等。下引文證成。而言等者。彼有十義。以證此中非信成就。謂一以說斷除疑網。出愛流。便得堅固不壞心故。以若未入聖。何以度疑。若是凡夫。何能不壞。入見諦者。乃能度疑。信不壞故。二若未入地。不應得有常持戒故。三不應云。生如來家故。四凡夫不得身語意業常無失故。五不應則獲功德法性身故。六不應云。則獲十地。十自在故。七不應則獲灌頂而升位故。八不應云。則身充滿於虛空故。九何以菩薩具智慧故。十信大乘者。猶爲易。能信此法倍更難故。豈有凡法難於聖法。故知此品正教捨凡展轉。乃至進入佛地。今疏文中。略引彼證。故致等言。是其一意。若爾已下。辨非。文有五段。初正以其所引難其所立。但難其一。餘九例知。謂既十地中方得灌頂。縱是初地。豈得灌頂。若云展轉下。二順設彼救。反以成立。若許從信下。三假縱彼救。結破彼立。下文自有下。四廣引文證。顯彼立非。孟浪者。出莊子。已見華藏品。下發心品下。五例破後文。所立非理。以彼下文。亦判彼品爲初地發心故。此既不立。彼居然非。疏問。下云。無量億劫勤修學。得是無上菩提智。斯則非一生也。亦非十千以爲無量。通斯難者。應有二義。一此約行布展轉義。故二約圓融。展促無礙故。如上所辨。故善財見仙人執手。一一佛所經。無量劫。故修短難思。特由於此。故賢首菩薩云。信大乘者。猶爲易。能信此法倍更難。以初心卽具一切功德。故難信也。鈔問。下云。第三引妨會宗。於中有二先問。卽此品文。安國堅執屬證發心。經多劫故。非是初心一生故也。亦非十千以爲無量。遮救自義。況有救云。無量卽十千故。

菩薩發意求菩提。非是無因無有緣。於佛法僧生淨信。以是而生廣大心。

疏第二菩薩發意下。正明發心修行勝德。文分爲五。初五頌發心行相。二信爲道元下。略示勝能。三若

常信奉下。所具行位。四或有刹土下。無方大用。五一切如來下。喻況玄旨。然此五段初一顯正發心。後四發心之德。第三亦兼修行。此及後二皆修行之德。鈔第三亦兼修行者。以所具行位。行即修行故。位即亦是修行之德。故云此及後二皆修行之德。

疏今初發心行相中。初偈總標。餘文別顯。瑜伽菩薩地。明發心有五種相。一自性。二行相。三所緣。四功德。五最勝。今文五偈具之。謂發意即是正願。為發心自性也。希求菩提。及下作有情義利。即行相也。菩提三寶有情。皆有所緣。能攝一切菩提分法。為其功德。不求五欲等。反顯菩薩所求最勝。鈔瑜伽等者。疏文有二。先釋科文行相之言。便引瑜伽明具五義。而行相為總。故為科目。

疏言因緣者。謂親能發起。求大菩提。因假之助發為緣。因即自性住性。內熏之力。緣即習所成性。又上二皆因。善友及境外熏為緣。瑜伽云。由有四因。四緣。四力。菩薩發心。四因者。一種性具足。二賴佛菩薩善友攝受。三多起悲心。四長時猛利難行苦行。無所怯畏。四緣者。一見聞佛神變威力。二聞法微妙。三見法欲滅。四見生受惑業苦。四力者。一自力。二他力。三因力。以宿習故。四加行力。謂於現法親善聞法。修善加行故。若具上因緣。及初三二力。當知不退。若因二四力。心不堅固。今經即初及三也。又起信論智印經。有七因緣。如彼應知。下別顯中。以三因。四緣。攝上諸義。三因者。謂信。悲。智。四緣者。三寶。衆生。鈔初中因緣之外。更加四力。緣。謂見聞境界。因。謂內心發起力。謂有所幹能。然即前四因。正望發心。以明力用。自力即從種性因發。他力即是善友所攝。因力即是多起悲心。加行力即長時苦行。又四力成就。即名為因。親能發故。今經即初及三者。文中無人勸故。不言因加行故。又起信下論云。信成就發。

心者。依何等人。修何等行。得信成就。堪能發心。所謂依不定聚衆生。有熏習善根力故。信業果報。能起十善。厭生死苦。欲求無上菩提。得值諸佛。親承供養。修行信心。經一萬劫。信心成就故。諸佛菩薩教令發心。或大悲故。能自發心。或因正法欲滅。以護法因緣故。能自發心。如是信心成就。得發心者。入正定聚。畢竟不退。名住如來種中。正因相應。若有衆生。善根微少等。未經萬劫。於中遇緣。亦有發心。所謂或見佛色相。而發其心。一或因供養衆僧。而發其心。二或因二乘之人。教令發心。三或學他發心。四如是等發心者。悉皆不定。遇惡因緣。或便退失。墮二乘地。智印經中亦同此。

疏今文中後半。總以信智因緣。三寶境信。謂於實德能。深忍樂欲。心淨爲性。故云淨信。然實謂一切事理德。謂三寶淨德。能。謂世出世善。有其力能。今法寶中已攝初後。亦三寶中皆具此三。體實具德。大用救生故。大者智心求大菩提。廣者悲心廣濟含識。翻彼二乘小愜心也。鈔信謂於實德等者。唯識第六云。云何爲信。於實德能。深忍樂欲。心淨爲性。對治不信。樂善爲業。此總明業然信差別。略有三種。一信有實。謂於諸法實事理中。深信忍故。二信有德。謂於三寶真淨德中。深信樂故。三信有能。謂於一切世出世善。深信有力。能得能成。起希望故。釋曰。實德能三。卽信依處。忍樂欲三。如次配之。言能得能成者。信已及他。今得後成。又無爲得有爲成故。論云。由斯對治不信。彼心愛樂證修。世出世善。釋曰。上釋信業。下欲揀別。故有問答。論云。忍。謂勝解。此卽信因。樂欲。謂欲。卽是信果。確陳此信。自相是何。問也。豈不適言。心淨爲性。此猶未了。彼心淨言。若淨卽心。應非心所。若令心淨。慚等何別。心俱淨法。爲難亦然。釋曰。此中三難。初持業釋。次依主釋。後鄰近釋。言爲難亦然者。同前慚等何別。亦是心王俱時法故。論

曰。此性澄清。能淨心等。以心勝故。立心淨名。如水清珠。能清濁水。慚善雖善。非淨爲相。此淨爲相。無滯彼失。又諸染法。各別有相。唯有不信。自相渾濁。復能混濁餘心。所如極穢物。自穢穢他。信正翻彼。故淨爲相也。正義竟有說信者。愛樂爲相應通三性。體應卽欲。又應苦集。非信所緣。此破小乘上座部也。有執信者。隨順爲相應通三性。卽勝解欲。若印順者。卽勝解故。若樂順者。卽是欲故。離彼二體。無順相故。此破大乘異師。由此應知心淨是信。結也。然今疏文。略引標釋。義已周備。今法寶下。以論配經。復有二意。一者別配。謂法有事理。卽是初實也。法有理性。卽出世善等。故是後能。故云今法寶中已攝初後。亦三寶中。皆具此三者。義以前三通於三寶。如文可知。次大者下。釋下句也。

不求五欲及王位富饒自樂大名稱。

疏別中初半偈。揀去偏僞。謂攝眷屬過。所不能染故。文中不求五事。求卽過故。一若求人天五欲。此能長貪。多是鬼因。二求王位長暎。多地獄因。三求富饒長癡。是畜生因。實通三塗。各從多說。四求自樂。是二乘因。五求大名稱。若勝負心。是修羅因。若我慢心。是外道因。又以理求樂。是人天因。爲王攝屬。是魔羅因。有二乘心。目之爲偏。有餘心者。名之爲僞。鈔初半偈。揀去偏僞者。卽天台止觀中意。然有二文。一當第五卷。明十法成乘中。有真正發菩提心。故云揀去偏僞。故下疏云。有二乘心者。目之爲偏等。二者第一卷中。明有五略。謂發大心。修大行。感大果。裂大網。歸大處。今卽第一發大心中文。然彼復分爲三。初方言。次揀非。後顯是。方言易了。今將不求一行。當彼揀非也。餘文卽當顯是。今初彼文云。道亦有通有別。今亦揀之。略爲其十。若心心念。念專貪瞋癡。攝之不還。拔之不出。日增月甚。起上品十惡。如五扇

提羅者。此發地獄心。行火途道。一若其心念念欲多眷屬。如海吞流。如火焚薪。起中品十惡。如調達誘衆者。此發畜生心。行血塗道。二若其心念念欲得名聞。四遠八方稱揚歎詠。內無實德。虛比賢聖。起下品十惡。如摩提提者。此發鬼心。行刀塗道。三若其心念念欲勝於彼。不耐下人。輕他珍己。如鴉高飛。下視人物。而外揚仁義禮智信。起下品善心。行阿修羅道。四若其心念念欣世間樂。安其臭身。悅其癡心。此起中品善心。行於人道。五若其心念念知三惡苦多。人閒苦樂相閒。天上純樂。爲天上樂。閉六根不出。六塵不入。此起上品善心。行於天道。六若其心念念欲大威勢。身口意業。纔有所作。一切弭從。此發欲界主心。行魔羅道。七若其心念念欲得利智辨聰。高才勇哲。鑒達六合。十方顯顯。此發勝智心。行尼韃道。八若其心念念五塵六欲。外樂蓋微。三禪之樂。由如石泉。其樂內熏。此發梵心。行色無色道。九若其心念念知善惡輪環。凡夫耽湎。賢聖所訶。破惡由淨慧。淨慧由淨禪。淨禪由淨戒。尙此三法。如飢如渴。此發無漏心。行二乘道。十若心若道。其非甚多。略舉十耳。結今疏欲具此十非。故於經文委曲而取耳。

疏文中分二。先總明。卽瑜伽意。後文中不求五事下。正釋經文。配成十非。然不必全爾。故致多言。以一煩惱有三塗因故。又但取意略明。但尋上引疏文。居然易了。但人天因。合其三界。一人二欲天。三上二界。餘文可知。有二乘下。結成。則前九爲僞。後一爲偏也。

但爲永滅衆生苦。利益世閒而發心。常欲利樂諸衆生。莊嚴國土供養佛。受持正法修諸智。證菩提故而發心。深心信解常清淨。恭敬尊重一切佛。於法及僧亦如是。至誠供養而

發心。

深信於佛及佛法。亦信佛子所行道。及信無上大菩提。菩薩以是初發心。

疏後三偈半。直顯真正別釋因緣。於中初偈。悲因下救。嚴土供佛。亦爲調生故。滅苦是悲。利樂是慈。次

一偈半。大智上供。上二不二。爲真正發心。後偈總結成信。兼信因行。其中對上四因四緣。可以意得。

鈔其中對上等等者。深心信解。及深信諸佛及佛法。卽第一種性具足因。恭敬尊重一切佛。卽第二賴佛

菩薩攝受因。以恭敬故。但爲永滅衆生苦。卽第三多起悲心也。常欲利樂諸衆生。莊嚴國土供養佛。卽

第四長時猛利難行苦行也。四因具矣。言四緣者。恭敬尊重一切佛者。以見聞神變威力故。卽第一緣。

受持正法修諸智者。以聞法微妙故。卽第二緣。又受持正法者。見法欲滅故。卽第三緣。但爲永滅衆生

苦者。卽見生受感業苦。是第四緣。見苦卽緣。長悲卽因。故雖一文。因緣具足。此中四力不具。故不會之。

疏又上從不求五欲下。卽顯信心之德。故瓔珞經云。修十信心。須具十德。今文並具。但不次耳。一遭苦

能忍。卽前反顯。二正顯中。初二句卽慈悲深厚。三次句及莊嚴國土。卽修習善根。謂利他善及淨十因

故。四有三字。卽供養諸佛。五受持一句。志求勝法。六證菩提故。卽求佛智慧。七一句。卽深心平等。八次

二句。卽親近善友。九次二句。卽心常柔和。謂至誠供養。柔和善順於佛法故。十有二句。卽愛樂大乘。十

德備矣。鈔又上從不求五欲下。重解經文。以上來所釋。參古德意。此下一向新意。不干舊解。文自有

五。一約信德。經文五偈。應分爲二。初一偈標信發心。後四偈彰信之德。今文並具等者。彼經次云。一親

近善友。二供養諸佛。三修習善根。四者志求勝法。五心常柔和。六遭苦能忍。七慈悲深厚。八深心平等。

九愛樂大乘。十求佛智慧。四有三字者。以供養佛字全同故。

疏又此十德。卽求菩提之意。下經休舍云。欲教化調伏一切衆生。盡無餘故。發菩提心等。鈔又此十德下。二明菩提意。而云發菩提心等者。彼廣有文。略舉十四。廣結無邊。今但舉一。以等十三。謂二欲承事供養一切諸佛。悉無餘故。發菩提心。其悉無餘下八字。一一皆有。三欲嚴淨一切諸佛國土。四欲護持一切諸佛正教。五欲成滿一切如來誓願。六欲往一切諸佛國土。七欲入一切諸佛衆會。八欲知一切諸佛世界中諸劫次第。九欲知一切衆生心海。十欲知一切衆生根海。十一欲知一切衆生業海。十二欲知一切衆生行海。十三欲滅一切衆生煩惱海。十四欲拔一切衆生煩惱習氣。悉無餘故。發菩提心。善男子。以要言之。菩薩以如是等。百萬阿僧祇方便行故。發菩提心。善男子。菩薩行普入一切法。皆證得故。普入一切刹。悉嚴淨故。是故善男子。嚴淨一切世界。盡我願。乃盡拔一切衆生煩惱習氣。盡我願。乃滿釋口。上皆菩提心所爲也。對今經文。可以意得。

疏又末後偈初句。卽自性住佛性。以信心佛衆生。無差別故。方是真法。可謂深信。次句卽引出佛性。後句卽至得果性。鈔又末後下三約佛性。卽隨難重顯。種性具足。三佛性義。卽佛性論第二卷。第三顯體分三。因品論云。復次佛性體有三種。三性所攝義。應知三種者。所謂三因。三種佛性。三因者。一應得。因。二加行。因。三圓滿。因。初卽二空所顯真如。由此應得菩提心。乃至道後法身故。二加行。因者。謂菩提心。由此心故。得三十七品。十度十地。乃至道後法身。三圓滿。因者。卽加行。因。由此故得一切圓滿。三種佛性者。應得。因中。具有三性。一住自性性。二引出性。三至得果性。釋曰。住自性者。謂道前。凡夫位。引出。

性者。從發心已。上窮有學聖位。至得果性者。無學聖位。

疏又文有四宏。可以意得。鈔又文有四宏等者。四約四宏也。文中不求五欲等。即顯煩惱無邊誓願斷。但爲永滅衆生苦。即衆生無邊誓願度。受持正法修諸智。即法門無盡誓願學。證菩提故。即佛道無上誓願成。

疏又上云。深心信解常清淨者。與理相應。方曰深心。若昔染今淨。淨則必始。始即必終。非常信也。信煩惱即菩提。方爲常淨。由稱本性而發心故。本來是佛。更無所進。如在虛空。退至何所。慨衆生之迷。此起同體大悲。悼昔不知。誓期當證。有悲故不爲無邊所寂。有智故不爲有邊所動。不動不寂。直入中道。是謂真正發菩提心。鈔又上云等下。五結歸真正。先顯真正菩提心體。有其三意。初約三心菩提。二約三觀。三約四宏。今初明大智心。次慨衆生迷。此下大悲心。後悼昔不知下大願心。即菩提心燈。大悲爲油。大願爲炷。光照法界。故上如次。即直心。大悲心。深心也。二約三觀者。悲願爲假觀。前大智心中。直明本性清淨。即是空觀。煩惱即菩提。本來是佛。即中道觀。三約四宏者。初通立理。以是圓教四宏。故稱性明之。次信煩惱即菩提下。別顯四宏。初即煩惱無邊誓願斷。二由稱本性而發心故下。即佛道無上誓願成。三慨衆生迷。此下衆生無邊誓願度。四悼昔不知下。法門無盡誓願學。此明四宏。即指上四宏。上但指文。今將深心之言。會通此四。令圓妙耳。有悲故下。二正結歸。謂上雖多義。不出悲智。故今結之。即結上疏文及經文耳。故止觀第五。明十法成乘中。第二真正發菩提心云。既深識不思議境。一苦一切苦。自悲昔苦。起惑耽湎。乃至云。思惟彼我。鯁痛自他。即起大悲。與兩誓願。衆生無邊誓願度。煩惱無邊

誓願斷。衆生雖如虛空。誓度如空之衆生。雖知煩惱無所有。誓斷無所有之煩惱。上二空觀。雖知衆生甚多。而度多多之衆生。雖知煩惱無邊底。而斷無邊底之煩惱。假觀雖知衆生如佛。而度如佛之衆生。雖知煩惱如實相。而斷如實相之煩惱。中觀何者。若但拔苦因。拔苦果。此誓雜毒。故須觀空。若偏觀空。卽不見衆生可度。是名著空者。諸佛所不化。若偏見衆生可度。卽墮愛見大悲。非解脫道。今則非毒非僞。故名爲真。非空邊非有邊。故名爲正。如鳥飛空。終不住空。雖不住空。跡不可尋。雖空而度。雖度而空。是故誓與虛空共鬪。故名真正發菩提心。釋曰。此上釋須三觀所以。又云。又識不思議心。一樂心。一切樂心。我及衆生。昔雖求樂。不知樂因。如執瓦礫。謂如意珠。妄指螢光。呼爲日月。今方始解。故起大悲。興兩誓願。謂法門無盡。誓願知。無上佛道誓願成。雖知法門永寂如空。誓願修行永寂。雖知菩提無所有。無所有中。吾故求之。上卽空觀。雖知法門如空。無所有。而有誓願。畫繪莊嚴虛空。雖知佛道非成所成。如空中種樹。使得華果。名假觀也。雖知法門及佛果。非修非不修。非證得非不證得。以無所證而證。而得。中觀是名非僞非毒。名之爲真。非空非愛見。名之爲正。如是慈悲誓願。與不思議境智。非前非後。同時俱起。慈悲卽智慧。智慧卽慈悲。無緣無念。普覆一切。任運拔苦。自然與樂。不同毒害。不同但空。不同愛見。是名真正發菩提心。釋曰。但觀上所引之文。疏文居然易了。卽撮其大意。而爲此疏。顯經深玄。然此經上下。菩提心義。文理淵博。見其撮略。故取而用之。引而證之。

信爲道元功德母。長養一切諸善法。斷除疑網。出愛流。開示涅槃無上道。

疏第二信爲道元下七頌略示勝能。於中初一頌總標。次五頌別釋。後一頌總結。今初初句又標道。

有二義。一果。所謂菩提涅槃。二因。謂三賢十聖。乘一直道。元亦二義。一本義。菩提本故。其猶滔滔之水。始於濫觴。二首義。元者善之長也。卽一因之初。功德二義。通因及果。母有二義。生長養育。下三句共釋初句。長養卽母。二義亦道元義。一切善法及第二句。卽因功德。第三一句。卽果功德。無上道者卽大菩提。由信長善。得此菩提。由信斷疑。出愛成涅槃。證不信身心如來。知見豈能開示菩提涅槃。鈔一本義等者。意以本義爲果德。元首義爲因德。元耳。言元者善之長也。卽周易乾卦文言。釋乾元亨利貞四德云。元者善之長也。亨者嘉之會也。利者義之和也。貞者事之幹也。君子體仁足以長仁。嘉會足以合禮。利物足以和義。貞固足以幹事。君子行此四德者。故曰乾元亨利貞。今但用其一字義耳。不信身心下。反成上義。知見相爲菩提。知見性爲涅槃。故法華論釋。開佛知見爲無上義。謂雙開菩提涅槃。信無垢濁心清淨。滅除憍慢恭敬本。亦爲法藏第一財。爲清淨手受衆行。信能惠施心無慳。信能歡喜入佛法。信能增長智功德。信能必到如來地。信令諸根淨明利。信力堅固無能壞。信能永滅煩惱本。信能專向佛功德。信於境界無所著。遠離諸難得無難。信能超出衆魔路。示現無上解脫道。信爲功德不壞種。信能生長菩提樹。信能增益最勝智。信能示現一切佛。疏次信無垢濁下。別顯中有二十句。一句辨一勝能。一心淨爲性。故能翻不信濁。二信理普敬。故翻憍慢。三十藏之內。信卽是藏。七聖財。中信爲第一。四信手。受取奉行。五信財。如夢所吝。六智論云。佛法大海。信爲能入。七增福智因。八到二嚴果。九十五根五力。各在初故。十一信本無惑。方斷惑根。十二

若向餘德。不名淨信。十三信境本空。故無所著。十四正信之人。不生八難。十五非不正信。十六正信解脫。十七成不壞本。十八爲菩提根。十九增佛勝智。二十究竟見佛。謂信自己心。自佛出現。信外諸佛。諸佛現前。故下經云。一切諸佛。從信心起。

是故依行說次第。信樂最勝甚難得。譬如一切世間中。而有隨意妙寶珠。

疏三是故下一偈。總結勝能。前法後喻。信樂者。信三寶性。己於方便諸度。求欲修行。信樂二字。是菩薩正意。由此二故。於諸行有能。故名最勝。非佛不信。故云難得。喻如意珠。略有五義。一勝義。法寶中王。故二希義。非佛輪王。餘無有故。三淨義。能清不信濁故。四貴義。出位行寶等。不可盡故。五蘊義。蘊衆德物。無障礙故。鈔喻如意珠等者。取與信相應義耳。若準寶性論。寶有六義。頌云。眞實。一世希有。二明淨。三及勢力。四能莊嚴世間。五最上不變等。六今此勝義。攝眞實最上二義。餘四則同。四卽勢力。五卽莊嚴。或無莊嚴。加此蘊義。然疏五義。皆言合法喻。思之可知。

若常信奉於諸佛。則能持戒修學處。若常持戒修學處。則能具足諸功德。戒能開發菩提本學。是勤修功德地。於戒及學常順行。一切如來所稱美。若常信奉於諸佛。則能興集大供養。若能興集大供養。彼人信佛不思議。

疏第三若常信奉下五十頌半。廣明信中所具行位。然有二意。一行布二圓融。古約圓融。故名信中所具。於中三。初明所具行。次辨所具位。三結歎功德。今初八頌半。分二。先五頌明信三寶以成諸行。後三頌半。明信展轉以成諸行。前中初三頌。信佛成行。初二句標章。持戒惡止也。修學處。善行也。瑜伽云。

既發心已應於七處修學。故名學處。謂一自利處。二利他處。三真實義處。四威力處。五成熟有情處。六成熟自佛法處。七無上正等菩提處。次一偈半。雙顯二德。若不持戒。尚不能得疥癩野干之身。況於菩提。戒止妄非。則性淨菩提開發。因果功德。皆依學處而生。故云地也。鈔尚不能得等者。卽薩遮尼撻子經第四。

疏後一偈。別明成供養行。謂財法供養。故云大也。

若常信奉於尊法。則聞佛法無厭足。若聞佛法無厭足。彼人信法不思議。

疏次一信法。

若常信奉清淨僧。則得信心不退轉。若得信心不退轉。彼人信力無能動。

疏後一偈。信增文並可知。

若得信力無能動。則得諸根淨明利。若得諸根淨明利。則能遠離惡知識。

若能遠離惡知識。則得親近善知識。若得親近善知識。則能修習廣大善。

若能修習廣大善。彼人成就大因力。若人成就大因力。則能殊勝決定解。若得殊勝決定解。則爲諸佛所

護念。

疏二有三頌。半成展轉行。展轉依前。功歸於信。

若爲諸佛所護念。則能發起菩提心。若得發起菩提心。則能勤修佛功德。

若能勤修佛功德。則得生在如來家。若得生在如來家。則善修行巧方便。

若善修行巧方便。則得信樂心清淨。若得信樂心清淨。則得增上最勝心。

疏二若爲諸佛下三十九頌。明所具諸位。於中成後四位。卽爲四段。初三頌明十住位。有六句。初句發心住。次句治地修行。二住。次句生貴住。次句方便具足住。次句正心住。後句增上是不退住。最勝心是後三住。準下釋之。鈔初明十住者。下明諸位。皆含義理。並如本品。後句增上者。由前正心。但聞讚毀不動。今聞無有利害更深。而心不退。故爲增上。欲當下文尋之。然皆隱位名存。其中行或合或開。或略或廣。不全次第者。意明圓融信門。卽頓具故。亦猶離世間品。六位頓成爲二千行。位位頓修。故若一向次第。但得行布一分義耳。

若得增上最勝心。則常修習波羅蜜。

若常修習波羅蜜。則能具足摩訶衍。若能具足摩訶衍。則能如法供養佛。若能如法供養佛。則能念佛心不動。若能念佛心不動。則常觀見無量佛。

疏二若得增上下二頌半。明十行位。波羅蜜是十行總名。摩訶衍是異二乘行。初二行收。如法供養。是順理行。次二行攝。念佛心不動。及常見佛。並是定慧行。故屬後六行。釋相可知。

若常觀見無量佛。則見如來體常住。若見如來體常住。則能知法永不滅。若能知法永不滅。則得辨才無障礙。若能辨才無障礙。則能開演無邊法。若能開演無邊法。則能慈愍度衆生。若能慈愍度衆生。則得堅固大悲心。

疏三若常觀見下三頌。明十迴向位。通顯三種迴向。佛體常住。是向菩提。法永不滅。是向實際。餘向衆

生。

若能堅固大悲心。則能愛樂甚深法。

疏四若能堅固下三十頌半。明十地位。初半頌是初地。謂深法。是所證真如。愛樂是極喜異名。若能愛樂甚深法。則能捨離有爲過。

疏二半頌是離垢地。以離犯戒有爲過故。

若能捨離有爲過。則離憍慢及放逸。若離憍慢及放逸。則能兼利一切衆。

疏三一頌離慢等。是三四二地。以三地於禪不著。故無慢。又以求法不懈。亦名離慢。第四地得出世間道品。故云無放逸。然不捨攝生。故云兼利。

若能兼利一切衆。則處生死無疲厭。若處生死無疲厭。則能勇健無能勝。

疏四有一頌明五地。謂雖得出世。而還處生死。故無厭。真俗互違。難合能合。餘地不過。故云勇健無能勝。此是難勝之名也。

若能勇健無能勝。則能發起大神通。若能發起大神通。則知一切衆生行。

疏五有一頌。明第六地。悲智不住。般若現前。謂神通攝物。是大悲行。知衆生行。是十二緣生。是大智行。若知一切衆生行。則能成就諸羣生。若能成就諸羣生。則得善攝衆生智。

若得善攝衆生智。則能成就四攝法。若能成就四攝法。則與衆生無限量。若與衆生無限量。則具最勝智方便。

疏六二頌半。明七地。謂初一明有中殊勝行。後一頌半。明空中方便智。準釋可知。

大方廣佛華嚴經疏鈔會本卷四十四

若具最勝智方便。則住勇猛無上道。若住勇猛無上道。則能摧殄諸魔力。若能摧殄諸魔力。則能超出四魔境。若能超出四魔境。則得至於不退地。若得至於不退地。則得無生深法忍。若得無生深法忍。則爲諸佛所授記。

疏七。若具最勝下三頌。明第八地。略辨六義。一道勝。謂無功用道。故云勇猛無上。二力勝。謂智力摧魔。三用勝。謂超四魔境。捨分段故。無蘊魔。無捨命故。無死魔。惑不現行。故超煩惱魔。覺佛十力。故超天魔。四位勝。不動地。故云不退也。五行勝。謂得無生忍。六因勝。謂此位中。當大授記位也。

若得諸佛所授記。則一切佛現其前。若一切佛現其前。則了神通深密用。若了神通深密用。則爲諸佛所憶念。若爲諸佛所憶念。則以佛德自莊嚴。疏八。二頌。明第九地。作大法師。略辨四義。一諸佛加持。名佛現前。二解了諸佛深密之法。三佛憶念增其慧力。四佛德自嚴。爲衆說法。

若以佛德自莊嚴。則獲妙福端嚴身。若獲妙福端嚴身。則身晃耀如金山。若得晃耀如金山。則相莊嚴三十二。若相莊嚴三十二。則具隨好爲嚴飾。若具隨好爲嚴飾。則身光明無限量。若身光明無限量。則不思議光莊嚴。

疏九。若以佛德下十九頌。明第十地位。分五。初八頌。三業殊勝德。初五身業。於中前三頌。明身體德殊。

勝。

若不思議光莊嚴。其光則出諸蓮華。其光若出諸蓮華。則無量佛坐華上。示現十方靡不徧。悉能調伏諸衆生。若能如是調衆生。則現無量神通力。

疏後二頌。明身業大用。

若現無量神通力。則住不可思議土。演說不可思議法。令不思議衆歡喜。

疏次演說一頌。語業勝。說法益生。

若說不可思議法。令不思議衆歡喜。則以智慧辨才力。隨衆生心而化誘。若以智慧辨才力。隨衆生心而化誘。則以智慧爲先導。身語意業恆無失。

疏後二頌。意業勝。智先導故。

若以智慧爲先導。身語意業恆無失。則其願力得自在。普隨諸趣而現身。若其願力得自在。普隨諸趣而現身。則能爲衆說法時。音聲隨類難思議。若能爲衆說法時。音聲隨類難思議。則於一切衆生心。一念悉知無有餘。若於一切衆生心。一念悉知無有餘。則知煩惱無所起。永不沒溺於生死。

疏二若以智慧爲先下。四頌。明三業廣大功。三輪攝生德。初一頌。身業。次一語業。後二意業。

若知煩惱無所起。永不沒溺於生死。則獲功德法性身。以法威力現世間。若獲功德法性身。以法威力現世間。則獲十地十自在。修行諸度勝解脫。

疏三若知煩惱下。二頌辨得法結位。

若得十地十自在。修行諸度勝解脫。則獲灌頂大神通。住於最勝諸三昧。若獲灌頂大神通。住於最勝諸三昧。則於十方諸佛所。應受灌頂而昇位。若於十方諸佛所。應受灌頂而昇位。則蒙十方一切佛手。以甘露灌其頂。

疏四若得十地下。三頌明三昧分。大盡分。受位分。並顯可知。

若蒙十方一切佛手。以甘露灌其頂。則身充徧如虛空。安住不動滿十方。若身充徧如虛空。安住不動滿十方。則彼所行無與等。諸天世人莫能知。

疏五若蒙下。二頌明大用難測。亦是釋名分事也。謂以法智雲。含衆德水。能蔽如空。竊重故。又若蒙下。二頌亦是進入佛地也。

菩薩勤修大悲行。願度一切無不果。見聞聽受若供養。靡不皆令獲安樂。彼諸大士威神力。法眼常全無缺減。十善妙行等諸道。無上勝寶皆令現。

疏第三菩薩勤修下。三頌結歎其德。初二法說。後一喻況。前中賢首云。初二句悲願內滿。謂菩薩勤修等者。結前若字下義。無不果者。結前則字下義。以若有彼則有此。非是前後鉤鎖相因。唯是本位信中有此。則有彼。同時具有。而說有前後。是故信門具足一切行位之相。然行雖無量。皆以悲願爲首。故就此結之。次二句。明此悲願益物不空。次一頌結前所具行位。初句舉人標法。威神卽信爲能具之由。次句結能證智眼。證如如永常故。次句結所證道。十善舉二地行。等取餘地。及餘位餘道。謂教證等。勝寶

皆現。鈔以若有彼等者。揀濫。明此是圓融義。纔得一位。卽得諸位。如十味香。纔燒一丸。如小芥子。十氣齊發。若有聞香。十味齊得。若得沈氣時。則得檀氣。若得蘇合。則得龍腦等。十味丸藥。服者齊得。亦準此知。非如鉤鎖。由得於前。方能得後。非如涉路。若行一里。則得二里。若行二里。則進三里。故此位中。不存位名。或開或合。正在於此。思之思之。

譬如大海金剛聚。以彼威力。生衆寶。無減無增。亦無盡。菩薩功德聚亦然。

疏後一頌。喻況。唯喻後偈。初句及威力。喻前初句。信體堅固。以喻金剛。並居智海之內。以信威力能生。所生衆寶。卽喻前第三句行位。第三句喻前法眼常全。

或有刹土。無有佛。於彼示現。成正覺。或有國土。不知法。於彼爲說妙法藏。無有分別無功用。於一念頃。徧十方。如月光影。靡不周。無量方便。化羣生。於彼十方世界中。念念示現成佛道。轉正法輪。入寂滅。乃至舍利廣分布。

疏第四。或有刹土。下二百三頌。明無方大用分。彼能無邊大用者。由普賢德徧一切時處。法界無限故。略辯十門。三味業用。一圓明海印三味門。二華嚴妙行三味門。三因陀羅網三味門。四手出廣供三味門。五現諸法門三味門。六四攝攝生三味門。七俯同世間三味門。八毛光照益三味門。九主伴嚴麗三味門。十寂用無涯三味門。以無不定心故。皆云三味。作用不同。略辨十種。又初門依體起用。末後明用不異體。中間並顯妙用自在。又十三味。皆具此三。鈔略辯十門等者。然還源觀立一體。二用。三徧。四德。五止。六觀。亦不出此。言一體者。卽自性清淨圓明體。卽通爲十定之體。言二用者。一海印森羅常住。

用。卽此第一三昧。二法界圓明自在用。卽華嚴三昧。言三徧者。一、一塵普周法界徧。二、一塵出生無盡徧。三、一塵含容空有徧。此三並是因陀羅網三昧門。言四德者。一、隨緣妙用無方德。二、威儀住持有則德。三、柔和質直攝生德。四、普代衆生受苦德。卽次下第六三昧門。言五止者。一、照法清虛離緣止。二、觀人寂怕絕欲止。三、性起繁興法爾止。四、定光顯現無念止。五、事理玄通非相止。言六觀者。一、攝境歸心。真空觀。二、從心現境妙有觀。三、心境祕密圓融觀。四、智身影現衆緣觀。五、多身入一鏡像觀。六、主伴互現。帝網觀。上之止觀。並是寂用無涯三昧門。故此十門。無不收矣。廣釋一體六觀等。具如還源觀辨。疏今初六頌。明海印三昧。文分爲二。前五別明業用周徧。後一總結大用所依。前中三。初三佛事。次一三乘。後一類餘。總顯十法界之化也。前中初一總明現佛說法。次一體用自在。初句揀非二義。一念無分別。二動無功用。下三句顯正二義。謂無念之念。一念徧於十方。無功之功。多門攝於羣品。月喻四義。準法可知。

或現聲聞獨覺道。或現成佛普莊嚴。如是開闡三乘教。廣度衆生無量劫。

疏二一頌辯三乘。

或現童男童女形。天龍及以阿修羅。乃至摩睺羅伽等。隨其所樂悉令現。

疏三有一頌類餘。

衆生形相各不同。行業音聲亦無量。如是一切皆能現。海印三昧威神力。

疏後一結用所依海印之義。昔雖略解。未盡其源。今以十義釋之。以表無盡之用。下經云如淨水中四

兵像。乃至莫不皆於水中現。又云海有希奇殊特法。能爲一切平等印。衆生寶物及川流。普悉包容無所拒。故大集十四云。如閻浮提一切衆生身。及餘外色。如是等色。海中皆有印像。以是故名大海爲印。菩薩亦爾。得大海印三昧。已能分別見一切衆生心行。於一切法門。皆得慧明。是爲菩薩得海印三昧。見一切衆生心行所趣。然此經文。多同出現。但出現現於四天下像。又約佛菩提。大集唯閻浮。約菩薩所得。然皆見心所趣等。了根器也。此文所現形類。應根器也。二文互舉。皆是所現。菩薩定心。以爲能現。鈔下經云。第二總明。卽引當經。及於他經。以示能現所現。海印之相。言乃至莫不皆於水中現者。其中閒云。各各別異。無交雜。劍戟弧矢類甚多。鎧冑車輿非一種。隨其所有。相差別。莫不皆於水中現。而水本自無分別。菩薩三昧亦如是。卽第十五經。又云海有希奇等者。卽此卷中下合云。無盡禪定。解脫者。爲平等印亦如是。福德智慧諸妙行。一切普修無厭足。大集十四下疏文分二。先正引。後解釋。前中卽虛空藏菩薩品。頭有一善男子言。此中亦爾。彼云亦復如是。餘皆全同。然此經文下解釋。此卽此上大集也。出現四天下像等者。文云。佛子。譬如大海。普能印現四天下中一切衆生色相形像。是故共說以爲大海。諸佛菩提亦復如是。普現一切衆生心念根性欲樂。而無所現。是故說名諸佛菩提。下偈文云。如海印現衆生心。以此說名爲大海。菩提普印諸心行。是故說名爲正覺。

疏言十義者。一。無心能現義。經云。無有功用無分別故。二。現無所現義。經云。如光影故。出現品云。普現一切衆生心念根性欲樂。而無所現故。三。能現與所現非一義。四。非異義。經云。大海能現。能所異故。非一。水外求像不可得。故非異。顯此定心與所現法。卽性之相。能所宛然。卽相之性。物我無二。五。無去來。

義水不上取物不下就。而能顯現三昧之心亦爾。現萬法於自心。彼亦不來。羅身雲於法界。未曾翳去。上之五義。與鏡喻大同。六廣大義。經云。徧十方。故普悉包容。無所拒。故明三昧心。同於法界。則衆生色心。皆定心中物。用周法界。亦不離此心。七普現義。經云。一切皆能現。故出現云。菩提普印諸心行。故此與廣大異者。此約所現。不揀巨細。彼約能現。其量普周。又此約所現。無類不現。彼約能現。無行不修。八頓現義。經云。一念現。故謂無前後。如印頓成。九常現義。非如明鏡。有現不現時。十非現現義。非如明鏡。對至方現。經云。現於四天下。像故。四兵羅空。對而可現。四天之像。不對而現。故云。非現現也。以不待對。是故常現。該三際也。具上十義。故稱海印。諸佛窮究。菩薩相似。鈔經云。徧十方者。卽是今經。於一念頃。徧十方也。普悉包含。無所拒者。卽指上引十義。所引皆上總中所引之經。及出現品。文多易了。但第十云。以不待對。是故常現者。此以第十釋成第九。卽爲揀異。由十成九。故云。釋成。而九豎論。十是橫說。故爲揀也。

疏問。仁王三賢。都無八相之文。初地方云。方生百三千。一時成正覺。此之八相。豈在信門。答。卽上所引大集。亦云。灌頂住菩薩。得佛神力。若菩薩成就如是等法。能於無佛世界。示現八相。乃至廣說。彼說住終。若占察經。漸次作佛。略有四種。何等爲四。一者信滿法。故作佛。所謂依種性地。決定信諸法。不生不滅。清淨平等。無可願求。故二解滿作佛。三證滿作佛。謂淨心地。四一切功德行滿作佛。依究竟菩薩地。起信依此。說信成就發心。能八相作佛。文據昭然。況圓融門中。不依位次。寄終教說。信滿卽能。因果無礙。以因門取。常是菩薩。以果門取。卽恆是佛。或雙存俱泯。自在難思。又此化現。非唯一位。依一類界。而

能具攝一切地位。徧於時處。故云念念徧十方也。鈔問仁王三賢下問也。卽上卷菩薩教化品經云。若菩薩住百佛國土中。作閻浮提王。王四天下。修百法明門。二諦平等心。化一切衆生。下偈云。善覺菩薩。四天下。雙照二諦平等道。權化衆生遊百國。始登一乘無相道。釋曰。此前更無成佛之文。答卽上所引下。第二答中有三。初指前引答。謂上引大集灌頂卽第十住。故云住終。則初賢已得八相。何得徧引仁王。三賢無文。若占察經。下次引別文答。謂占察經。作佛有四。初是信滿。正與今文相當。餘三因便故來耳。二解滿作佛。卽同前大集灌頂受位。三證滿者。初證名證滿。故云淨心地。卽初地故。四究竟菩薩地。卽第十地後。故起信云。菩薩地盡。覺心初起。心無初相。以遠離微細念。故得見心性。心卽常住。名究竟覺是也。起信依此下。上正引經。此方引論。用信成就發心。卽第一信滿位。論云。菩薩發是心故。則得少分見於法身。以見法身故。隨其願力。能現八種利益衆生。所謂從兜率天退入胎。住胎。出胎。出家。成道。轉法輪。入涅槃。卽八相之文也。況圓融門等者。三況出圓義也。則上所引。尙是行布。以四位成佛。深淺不同故。今初卽具後。故是圓融。今約信滿。猶寄終教說耳。因果無礙下。通伏難。謂有難云。若初卽後。應壞因果故。故爲此通。明其無礙。正在因時。卽有果。果中有因。隨門不同。名因名果。體無前後。故得圓融。雙存則亦因亦果。俱泯則果海離言。又此化現非唯等者。重揀前文。以圓融非唯一位。則顯具一切地位。非依一類界。則顯徧於時處也。第一海印三昧竟。

嚴淨不可思議。剎供養一切諸如來。放大光明無有邊。度脫衆生亦無限。智慧自在不思議。說法言辭無有礙。施戒忍進及禪定。智慧方便神通等。

如是一切皆自在。以佛華嚴三昧力。

疏第二嚴淨下華嚴三昧。文有十句。略辨七行。前六句各一行。七八是十度行。九結上自在。十總結所依。萬行如華嚴法身故。餘如別說。鈔萬行等者。遺忘集說。略有十觀。一攝相歸真觀。二相盡證實觀。三相盡無礙觀。四隨相攝生觀。五緣起相收觀。六微細容攝觀。七一多相即觀。八帝網重重觀。九主伴圓融觀。十果海平等觀。然此十觀。融四法界。初二理法界。始終不異。三即事理無礙法界。四即事法界。次五即事事無礙法界。五即一多相容不同門。六即微細相容安立門。七即諸法相即自在門。八即因陀羅網境界門。九即主伴圓融具德門。其第十觀。果海絕言。通爲前四之極。則四法界十種玄門。皆約因分。然此十觀。略收萬類。不異玄中。故指在餘。又釋題中。廣顯華嚴義竟。又還源觀釋云。廣修萬行。稱實成德。普周法界。而證菩提。如華有結實之用。行有感果之能。今則託事表彰。所以舉華爲喻。嚴者。行成剋果。契理稱真。性相兩亡。能所俱絕。顯煥炳著。故名嚴也。良以非真流之行。無以契真。何有飾真之行。不從真起。斯則真該妄末。行無不修。妄徹真源。相無不寂。故曰法界自在。圓明無礙。用爲華嚴三昧也。若更總釋。總以萬行嚴於法界。成於法身。爲華嚴也。行有行布。圓融成佛。亦有十身總別。別如普眼長者。以十波羅蜜嚴成十身。融如八地。一念之中。十度圓修。成佛之時。十身無礙。故曰華嚴。餘如題中。

第二華嚴三昧竟

一微塵中入三昧。成就一切微塵定。而彼微塵亦不增。於一普現難思刹。彼一塵內衆多刹。或有有佛。或無佛。或有雜染。或清淨。或有廣大。或狹小。

或復有成或有壞。或有正住或傍住。或如曠野熱時燄。或如天上因陀網。如一塵中所示現。一切微塵悉亦然。此大名稱諸聖人三昧解脫神通力。

疏第三一微塵中下四頌。明因陀羅網三昧門。於中初二句標定心境。然有二意。一由一多相卽。故入一定能成多定。由成多定。令一塵內有一切塵。一一塵中現一切刹。二但令一塵現刹。一切亦爾。故云成就一切微塵定。次二句明不壞相而普現。故云不增。次二頌明一塵中所現刹相。無礙如燄。重現如帝網。次半頌舉一例餘。亦有二意。一例上一塵之內所具之塵。二例如一塵入定示現。餘塵入定示現亦然。鈔次半頌者。前意對前第一意。旣一塵之中有多塵。向來方說一塵攝刹。今方說塵內所具餘塵攝刹。後意對前第二意。此所例塵。非前塵內。是前塵外徧法界中塵也。

疏後二句結用所因。略辯三門。一三昧力。此同標中。二不思議解脫力。如不思議品云。於一塵中現三世佛刹等。三神通力。謂幻通自在。並如下說。三因陀羅網三昧門。竟。若欲供養一切佛。入於三昧起神變。能以一手徧三千。普供一切諸如來。十方所有勝妙華塗。香末香無價寶。如是皆從手中出。供養道樹諸最勝。無價寶衣雜妙香。寶幢幡蓋皆嚴好。真金爲華寶爲帳。莫不皆從掌中雨。十方所有諸妙物。應可奉獻無上尊。掌中悉雨無不備。菩提樹前持供佛。十方一切諸妓樂。鐘鼓琴瑟非一類。悉奏和雅妙音聲。靡不從於掌中出。十方所有諸讚頌。稱歎如來實功德。如是種種妙言辭。皆從掌內而開演。

菩薩右手放淨光。光中香水從空雨。普灑十方諸佛土。供養一切照世燈。
又放光明妙莊嚴。出生無量寶蓮華。其華色相皆殊妙。以此供養於諸佛。
又放光明華莊嚴。種種妙華集爲帳。普散十方諸國土。供養一切大德尊。
又放光明香莊嚴。種種妙香集爲帳。普散十方諸國土。供養一切大德尊。
又放光明末香嚴。種種末香集爲帳。普散十方諸國土。供養一切大德尊。
又放光明衣莊嚴。種種名衣集爲帳。普散十方諸國土。供養一切大德尊。
又放光明寶莊嚴。種種妙寶集爲帳。普散十方諸國土。供養一切大德尊。
又放光明蓮莊嚴。種種蓮華集爲帳。普散十方諸國土。供養一切大德尊。
又放光明瓔莊嚴。種種妙瓔集爲帳。普散十方諸國土。供養一切大德尊。
又放光明幢莊嚴。其幢絢煥備衆色。種種無量皆殊好。以此莊嚴諸佛土。
種種雜寶莊嚴。蓋衆妙繒幡共垂飾。摩尼寶鐸演佛音。執持供養諸如來。
手出供具難思議。如是供養一導師。一切佛所皆如是。大十三昧神通力。

疏第四若欲下十八頌。明手出廣供三昧門。初一總標。後一通結。中間別顯。欲顯勝妙。略舉一手爲供。所依。由於昔時以手持供。供佛施人。稱周法界。故令眞流供具等諸佛之難思。鈔由於昔時等者。此出因也。供佛施人。約其施行。稱周法界。約其施心。入深觀故。故令眞流等者。顯今果也。眞流供具。顯出供時心。以稱法界。手出供具。故等諸佛之難思者。稱因境也。因雖尊勝。心不稱境。非眞供養。由稱眞之。

因感稱真之果。能供真佛之境。四手出廣供三昧門竟。

菩薩住在三昧中。種種自在攝衆生。悉以所行功德法。無量方便而開誘。

疏第五菩薩住下八頌。明現諸法門三昧門分四。初一總標多門。

或以供養如來門。或以難思布施門。或以頭陀持戒門。或以不動堪忍門。
或以苦行精進門。或以寂靜禪定門。或以決了智慧門。或以所行方便門。
或以梵住神通門。或以四攝利益門。或以福智莊嚴門。或以因緣解脫門。
或以根力正道門。或以聲聞解脫門。或以獨覺清淨門。或以大乘自在門。
或以無常衆苦門。或以無我壽者門。或以不淨離欲門。或以滅盡三昧門。

疏二有五頌。別顯二十種門。供等卽門。通入佛果故。

隨諸衆生病不同。悉以法藥而對治。隨諸衆生心所樂。悉以方便而滿足。
隨諸衆生行差別。悉以善巧而成就。

疏三一頌半。結多所因。由四悉檀故。初半對治。次半世界。隨行差別。卽當爲人。而成就言。謂第一義。

鈔初半對治者。對治文顯。隨心所樂。爲世界者。順心令喜故。隨行差別。卽當爲人者。心行不同。生善異故。如云。心寂靜。應教禪定。若心明利。爲說智慧。悉以善巧而成就。文則連上。屬於爲人。謂第一義者。謂要見理。見理方得名成就耳。又成就言。通於上三。前三悉檀。皆爲見理故。

如是三昧神通相。一切天人莫能測。

疏四半頌。結用難測。五現諸法門三昧門竟。

有妙三昧名隨樂菩薩住此普觀察。隨宜示現度衆生。悉使歡心從法化。

疏第六有妙下十七頌。明四攝攝生三昧門。文分爲二。初一偈總標名用。

劫中饑饉災難時。悉與世閒諸樂具。隨其所欲皆令滿。普爲衆生作饒益。

或以飲食上好味。寶衣嚴具衆妙物。乃至王位皆能捨。令好施者悉從化。

或以相好莊嚴身。上妙衣服寶瓔珞。華鬘爲飾香塗體。威儀具足度衆生。

一切世閒所好尚。色相顏容及衣服。隨應普現愜其心。俾樂色者皆從道。

疏餘頌別顯於中分四。初四頌。布施攝。初一偈半。求受用者。恣其所須。次半偈。求自在者。施以王位。又

此施位卽難行施。以是可愛著故。次偈。身行法施。後偈。妙色悅心。是無畏施。又後二偈。初身行法儀。後

服世妙飾。貴悅物心。隨求卽與。鈔布施攝中。前二偈有兩重釋。先約財施。所須王位。皆屬外財。故王

位兼於身命。亦屬內財。又此施位下。第二重釋。次半偈。可愛著物。卽三種難行之一。次法及無畏。兼前

財三。爲一切施。又將後二。屬於遂求。然準瑜伽六度四攝。各有九門。頌云。自性一切難。一切門善士。一

切種遂求。二世樂清淨。自性皆一。一切或二。或三。難行皆三。一切門皆四。善士皆五。一切種皆六。遂求

皆七。皆八。二世樂皆九。清淨皆十。四攝卽當三十三卷。至十行品更說其相。今疏言卽難行者。以難行

有三。一物少自在施。二可愛著物施。三極大艱難獲財施。今當第二難也。又後二偈者。是遂求施。遂求

有八。一匱乏飲食而求乞者。施以飲食。二匱乏車乘而求乞者。施以車乘。三乏衣服。四嚴具。五資生什

物。六種種塗飾香鬘。七舍宅。八光明。皆如初二句。會文可知。

迦陵頻伽美妙音。俱枳羅等妙音聲。種種梵音皆具足。隨其心樂爲說法。八萬四千諸法門。諸佛以此度衆生。彼亦如其差別法。隨世所宜而化度。

疏次二頌愛語攝一切愛語。謂慰喻慶悅勝益之言。鈔一切愛語等者。下所列卽三愛語。一慰喻愛語。二慶悅愛語。三勝益愛語。

疏言種種梵音者。卽八種梵音。一最好聲。其音清雅。如迦陵鳥。二易了聲。言辭辯了。三和調。四柔輒。五不誤。六不女。七尊慧。八深遠。言俱枳羅者。亦云都吒迦。此云衆音合和微妙最勝。皆愛語之具。隨心說法。應在後偈。隨世所宜。應在前偈。以瑜伽一切愛語。略有二種。一隨世儀軌語。二順正法教語。今開示佛說八萬法門。卽順正教也。鈔言種種梵音者。文中具列初二疏釋。後六但標。若釋。應云。三調和。謂大小得中。四柔輒者。言無羸獷。五不誤者。言無錯誤。六不女者。其聲雄朗。七尊慧者。言無戰懼。八深遠者。躋輪發聲。隨心等者。以後偈說八萬法門。是順正法教語。故應合云。隨心爲說。前偈種種樂音。故是隨世儀軌。合言隨世所宜而化誘。

衆生苦樂利衰等一切世間所作法。悉能應現同其事。以此普度諸衆生。一切世間衆苦患。深廣無涯如大海。與彼同事。悉能忍。令其利益得安樂。

疏三有二頌明同事攝。物見菩薩俯同其事。知有義利而修行。故於中初頌一切同事。八風等事。皆悉同故。後偈難行同事。忍於諸苦而同事。故鈔初頌一切同事者。瑜伽同事。不舉別相。但同上利行。卽

名同事故。利行居先。則事同利衰等。爲一切也。等取毀譽稱譏苦樂。忍於諸苦等者。難行有三。亦無別相。卽同三利行爲三難行同事。謂一諸未行勝善根因。諸有情所行利行。二現在耽著廣大財位。衆具圓滿。諸有情所行利行。三於外道本異邪見邪行所行利行。同事例耳。今於上三同事。皆須忍苦。若有不識出離法。不求解脫離諍憤。菩薩爲現捨國財。常樂出家心寂靜。家是貪愛繫縛。所欲使衆生悉免離。故示出家得解脫。於諸欲樂無所受。

疏四有八頌。明利行攝。謂說趣義利之行。以益有情於中初二偈。一切利行。此有三種。一於現法利。勸導利行。謂令以德業。招守財位。以益近故。經文略無。二於後法利行。謂勸捨財位。清淨出家。卽當初偈。三於現法後法利行。謂勸離欲。卽後偈也。又初一偈。卽難行利行。此自有三。一不識出離。卽外道異執。二不求解脫。卽未種善因。三現捨國財。誘耽財位。於此利行。是謂難行。菩薩示行十種行。亦行一切大人法。諸仙行等悉無餘。爲欲利益衆生故。

疏次一偈。初句卽攝二利行。一卽十種清淨利行也。二令離十惡。卽此世他世樂利行。次三句卽善士利行。慈心勸導等故。鈔一卽十種等者。謂一依外清淨有五。二依內清淨有五。依外五者。一無罪利行。二不轉利行。三漸次。四徧行。五如應論廣釋其相。依內五者。一謂諸菩薩於諸有情。起廣大悲。意樂現前而行利行。二諸菩薩於諸有情。所作義利。雖受一切大苦劬勞。而心無倦。深心歡喜。爲諸有情而行利行。三安處最勝。第一財位。而自謙下。如子如僕。及離憍慢而行利行。四心無愛染。無有虛僞。真實哀愍而行利行。五起畢竟無復退轉慈愍之心。而行利行。次三句。卽善士利行者。善士有五。一於真實

義勸導有情。二於應時勸導。三於能行攝勝。妙義勸導。四於有情柔軟勸導。五於有情慈心勸導。此之五相皆是大人之法。慈心勸導。舉後等初。

若有衆生壽無量。煩惱微細樂具足。菩薩於中得自在。示受老病死衆患。或有貪欲瞋恚癡。煩惱猛火常熾然。菩薩爲現老病死。令彼衆生悉調伏。

疏次二偈卽遂求利行。謂衆生爲八纏所繞。開解令離。故名遂求。初偈卽化無愧纏。以恃壽長不知進修。不知此身。但姪欲生。終竟敗壞。具諸煩惱故。後偈開解無慚纏。衆生餘略不具。鈔初爲八纏者。論云。此略有八。謂諸菩薩見諸有情於應慚處。爲無慚纏之所纏繞。方便開解令離。彼纏一無慚纏。二無愧。三昏沈。四睡眠。五掉舉。六惡作。七嫉。八慳。皆如無慚纏說。

如來十力無所畏。及以十八不共法。所有無量諸功德。悉以示現度衆生。記心教誡及神足。悉是如來自在用。彼諸大士皆示現。能使衆生盡調伏。

疏次二偈卽一切種利行。初偈卽應攝受者而攝受之。後偈卽應調伏者而調伏等。鈔卽一切種利行者。彼說或六或七。總有十三。六者一應攝受者正攝受之。二應調伏者正調伏之。三憎背聖教者。除其悲惱。四處中住者。令入聖教。五於三乘中。令其成熟。六已成熟者。令得解脫。云何七種。謂諸菩薩安處一分所化有情於善資糧守護長養。所謂一依下乘出離。二依大乘出離。三於遠離。四於心一境性。五於清淨諸障。六於二乘而正安處。七於無上正等菩提。而得安處。

菩薩種種方便門。隨順世法度衆生。譬如蓮華不著水。如是在世令深信。

疏後一偈卽一切門利行。謂不信令信故。亦總結諸利行也。鈔後一偈卽一切門等者。此略有四。一不信令信。二犯戒有情令戒圓滿。三惡慧有情令慧圓滿。四慳慳有情於捨圓滿。今疏文中略舉其一。疏喻伽廣說利行居先。略明同事居後。此則先略明同事者。以利行中若以行勸修。與愛語相近。若自示行卽同事相近。同事卽是利行。利行未必同事。此二相近。廣略互影耳。又次下三昧亦同事。故。

六四攝攝生三昧門竟

雅思淵才文中王歌舞談說衆所欣。一切世間衆技術。譬如幻師無不現。或爲長者邑中主。或爲賈客商人導。或爲國王及大臣。或作良醫善衆論。或於曠野作大樹。或爲良藥衆寶藏。或作寶珠隨所求。或以正道示衆生。若見世界始成立。衆生未有資身具。是時菩薩爲工匠。爲之示現種種業。不作逼惱衆生物。但說利益世間事。呪術藥草等衆論。如是所有皆能說。一切仙人殊勝行。人天等類同信仰。如是難行苦行法。菩薩隨應悉能作。

疏第七雅思下十七頌。俯同世間三昧門。於中三。初六身同世間利益衆生。若依若正。無不示爲。或作外道出家人。或在山林自勤苦。或露形體無衣服。而於彼衆作師長。或現邪命種種行。習行非法以爲勝。或現梵志諸威儀。於彼衆中爲上首。或受五熱隨日轉。或持牛狗及鹿戒。或著壞衣奉事火。爲化是等作導師。或有示謁諸天廟。或復示入恆河水。食根果等悉示行。於彼常思已勝法。

或現蹲踞或翹足。或臥草棘及灰上。或復臥杵求出離。而於彼衆作師首。如是等類諸外道。觀其意解與同事。所示苦行世靡堪。令彼見已皆調伏。

疏次六示同外道救彼邪黨。初五別辯。後一總結。義如別說。

衆生迷惑稟邪教。住於惡見受衆苦。爲其方便說妙法。悉令得解真實諦。

疏三衆生迷惑下五頌。明語業大用。初一總明。次三別顯。後一總結。

或邊呪語說四諦。或善密語說四諦。或人直語說四諦。或天密語說四諦。

分別文字說四諦。決定義理說四諦。善破於他說四諦。非外所動說四諦。

或八部語說四諦。或一切語說四諦。隨彼所解語言音。爲說四諦令解脫。

疏次別中云。或邊呪語者。梵云達邏鼻茶曼達邏鉢底鞞。言達邏鼻茶者。是南印度中邊國名也。此云

消融。曼達邏者呪也。鉢底鞞者句也。謂其國人稟性純質。凡所出言。皆成神呪。若鄰國侵害。不用兵仗。

但以言破之。彼自喪滅。故曰消融。呪句也。或云唯童男童女。方得言成呪句。餘不得也。又天密語等者。

婆沙七十九說。世尊有時爲四天王。以聖語說四諦。二王領解。二不能解。世尊憐愍。故以南印度邊國

俗語說四諦。二天王中一解一不解。世尊憐愍。故復以一種蔑戾車語說四聖諦。時四天王皆得領解。

鈔婆沙七十九者。彼云毘奈耶。說世尊有時爲四天王。以南印度邊國俗語說四聖諦。謂盪泥迷泥

瑜部達。刺蔑戾車語說四聖諦。謂摩奢都奢僧攝摩薩縛。但囉毘刺達。論引淨名圓音爲難。下釋有

七。一云有作是說。佛以聖語說四聖諦。能令一切所化有情。皆得領解。何以作此等諸說。答爲滿彼意。

故。彼天欲聞故。下並取意引之。二復次世尊欲顯於諸言音皆能善解故。爲有疑佛不能餘語等。三復次有所化者。依佛不變形言而得受化。有所作者。依佛轉變形言而受化者。四復有說者。佛以一音說四聖諦。不能令一切所化有情皆得領解。世尊雖有自在神力。而於境界不能改越。如不能令耳見諸色等。通圓音云。答不須通。非三藏故。諸讚佛頌言多過實。如常在定不睡眠等。皆過實也。五復次如來言音徧諸聲境。隨所欲語。皆能作之。故復伽陀作如是說。六復次佛語輕利。速疾轉故。故云佛以一音演說法。衆生各各隨所解。七復次如來言音。雖有多種。而同有益。故說一音釋曰。然上七解。前三可通。後四淺近。卽彼小乘三藏說故。蔑戾車者。三藏云惡中惡。亦云奴中奴。皆義翻耳。

疏善破於他者。以因明比量等。眞能破故。非外所動者。眞能立故。不爲他破。

所有一切諸佛法。皆如是說。無不盡。知語境界不思議。是名說法三昧力。

疏後一偈類結。非唯說四諦。六度萬行等皆然。一心說法。得語實性。能起隨類之用。名三昧力。七俯同世間三昧門竟。

